



डॉ रोशन सराफ
“रोशि रोशि”

गुरु पादन तल



रावुर पादन तल

Donated by
Prof. B. B. Bhat
through Prof. Virender Ransal.

G.M. College of Education
Raipur, Bantala
Jammu.

Acc No... 5476
Date... 29/7/2024

डा० रोशन सराफ “रोशि—रोशि”

A collection of Bhakti Bhajans

By Dr. Roshan Saraf

‘Roshi-Roshi’

“Gware Paadan Tal”

Author

Dr. Roshan Saraf ‘Roshi-Roshi’

(ग्वडुत)

शॉयरी तु साधना

यस छु पोज़ श्रेह मनि, तस छे बॅखती श्रद्धा ।

सुय छु पोज़ साधक, तस छु मरहबा ।।

‘सायिल’

आम शॉयरस तु भक्ति शॉयरस मंज छे फर्क । शॉयिर गव सुय युस पनुन्य बावथ तु पनुन इजहारि खयाल पद्यन याने शारन मंज करि । युस पनुन्यन व्यचारन नज्माँविथ अवामस आयुत थावि । युस लुख शारुकि तर्जु तु पनुनि खास बंगु ग्यवन । स्व हैकि रंगाबु रॅग्यु खयालन तु व्यचारन हुंज बावथ ऑसिथ । शारु सिनिफ याने बुनियोदी शॉयरी हुंघ ओसूल तु लवॉज्यमात वरतावस अँनिथ छु अथ बावस भाव हुरान तु म्वल खसान अदु छु लुकन ति वयान तु बराह यिवान ।

सोन कुलहुम तवॉरीख, तँहजीब तु तम्मदुन छु सीनु बु सीनय तु बेयि यिमुवय बॉतव, वन वन हुर्यव, चु पद्यव, वाखव, श्रुक्यव, नाति शरीफव, आराधनायव, व्यनुचव, दुआ तु हमुदव, ऑहियव, दासतानव तु दलीलव, मरसीयव, तु लीलायव क्यो भजनव दॅसी रॅछरावनु आमुत । यूतुय योत नु अथ मंज छि सॉन्य लुकु बॉथ, लड़ीशाह, न्यन्दु बॉथ, थॅज बॉथ,

रेडुसलमनुक्क्य् बॉथ, हजुल तु मज़ाक, शुर्य बॉथ, तु बैयि ति वाराहव
चीज़व छु पनुन्य् पनुन्य् हमियथ सानि कौशरि माजि ज़ेवि तु अमिकिस
अदबी तवौरीखस पनुन खास द्युत पेशकश थोवमुत ।

अदबुक्यन् द्वशवुनी हिसन नसरस तु नज़मस याने गद्यस तु पद्यस छि
ब्योन सिनफु, नज़्म, दआ, हमुद, आरती, मुनाजात, गज़ल, रुबायि, कतु,
मरसी तु हुसैनी फलसफु बेतरि । प्रथ सिनफि छु पनुन पनुन लाहये अमल
तौर तरीक तु तर्ज आसान ।

पथ गव कुनिति रंगस मंज़ छु शार तु शारुत लॉज़िमि मलज़ूम । अथ छुन
इन्कार । पतु रूद्य वज़न, कौफियि तु रिदीफ, यिम छि शॉयरी हुंद्
बुनियौदी औसूल । यिमव वरौय हेकि नु यि शॉयरी साज़स खँसिथ तु
मूसीकार तु संगीतकार हेकि नु अथ कम्पोज़य कँरिथ । शॉयिर छु
तहतुललफ़ज़स मंज़ शार बोज़नावान । कौन्सि कौन्सि छु भगवान सुंद
अनुग्रेह ज़ि तस छु मौदुर तु म्यूठ ग्यवनुक वस्फ तु रुत ग्वण । सु छु पनुनि
मेछि लयि मंज़ तरनुमस मंज़ गेविथ अथ बैयिहन ति मकबूल बनावान ।

ज़िमनी तौर करु बु येत्यथ यि कथ वनुनच जसारथ ज़ि वक्तकिस
बदलावस सुत्य सुत्य छे ज़िन्दगी हुन्दिस प्रथ शोबस मंज़ पनुनि पनुनि आयि
तब्दीली यिवान । यि छु अख क्वदरँती अमल । अदु सानि शॉयरी मंज़ ति
आयि नॅव्य् नॅव्य् इन्कलाब, तिक्याज़ि इन्साँनी द्यमागन कोड स्यठाह काड
तु अहँन्ज़व नज़रव कोड वाश, ख्यालातन तु जज़बातन लॅज ग्रख । बावथ
करनस, व्यछुयि तु वखनयि अँन्य औरूज़व तँन्नी तु ठॅर्य । ज़ौहिर छु तिम

द्रायि यिमव हदव न्यबर तु बेबोकी सान हेचुख पनुन्यन, व्यचारन, तु
ख्यालन हुंज खुलु पौठ्य बावथ करुन्य। अथ कलामस वोनुख आज़ाद
शॉयरी। चिनाचि वनि शॉयरव आज़ाद नज़्मु तु आज़ाद गज़लु। यि ति
आव अख दौर। यि कथ छे येत्यन स्वठुहय ज़रूरी वनुन्य बासान ज़ि तथ
आज़ाद शॉयरी ति छु पनुन अख खास असलूब तु तरीकि अमल।
बिल्कुल यलु छेनु स्व शॉयरी केंह। अथ ति छे अख पनुन्य आय त्राय तु
तुलु त्राव। शारुत बेतरि छि तति ति ज़रूरथ। नतु छुनु तस्सवुरुय स्व बनि
शॉयरी। ज़ानन वोलुय हैकि आज़ाद शॉयरी त कामयाबी सान करिथ।

ख्यालातन हुंघ् अम्य् सँहलाबन ह्योत नु हमनुक नावुय तु आयि
नसरी शॉयरी बारसस। बहरहाल छु मे पनुनिस असली मौजूअस मुतलिक
वनुन ज़ि सानि भँक्ती शॉयरी मंज क्वाह छु आम शॉयरी निशि ब्योन, स्व
गँयि देवमाला य्वसु भक्ति शॉयरी पनुन्य खास छे तु नातिया शॉयरी पनुन्य
खास तु सूफी शॉयरी ति ब्योन तु बिदून छे आसन। यिमु शारु सिनफु छि
रूहॉनी गुज़ा बनान यछन तु दिलचस्पी थवनवाल्यान हुन्दि खॉतर। व्यनँच,
आराधानायि, लीलायि, हमुद, दुआ, ऑही, दरूद, भजन, आरती गँयि
अमिय अंदाजुच शॉयरी। यि छे अँकीदती, श्रद्धायिवाजेन्य शॉयरी हुंदिस
जुमरस मंज ति यिवान। यिमन सिनफन छि पनुन्य मखसूस बंग तु तर्ज ति
आसान। अम्युक प्रथ अख शार छु पनुन मतलब तु मकसदु बोरुत आसान।
सेज़ि नसरी कथि ख्वतु छु अथ स्यठाह सोन तु गोन असर आसान।
र्यवाँयती असर छु व्यनचन, आराधनायण तु लीलायन हुंद असल रुफ।
यिर्यवायती आय छु अमिच शूब तु अम्युक पौराव तु साजु सिंगारु। सुती

छु यिति सँही ज़ि भजन, ऑर्चरु नाद तु दीवी दीवताहन हुंज़ भक्ति तु तिहुंज़
लीलायि छि बँखत्यन तु साधकन अलावु आम लूकन ति लयि अनान,
ब्यकासस अनान तु आनन्द दिवान। दयि नावस छु बज़र, दयि बँखती छु
मंज़ु तु मेछर। यि छि शॉन्ती दिनु बापथ खास वथ तु व्यद। दयि स्मरणायि
तु ग्वरु आराधनायि मंज़ छु पनुन अख अलगुय स्वख। दय लबनु बापथ छि
बँखती शॉयरी अथ मँन्ज़िलस वातुनुचि हेरि खास ह्युव वसीलु। भजन
कीर्तन छु बँखती तु मनुचि शॉन्ती हुंद ग्वडन्युक हेरु पोव मानुनु आमुत।
तवय छु वनुनु आमुत।

भजन बिना भक्ति नहीं रे।

भजन बिना शान्ति नहीं रे।।

म्यानि येमि सरनामुक “शॉयरी तु साधना” लुबि लुबाब छु ग्वरु
बँखती य्वसु मे यथ “ग्वरु पादन तल” नावुचि मॉर्य मन्ज़ि ग्वरु बखती
रच़नायि सोम्बरनि मंज़ वारु सँन्य सँन्य नज़रि गँयि स्व छे दाद दिनस,
साम ह्यनस तु तॉरीफ करनस लायक स्यठुहुय दिलचस्प, शॉयरी रंगु प्रथ
ल्यहाज़ मुकमल तु कामयाब। य्वसु प्रथ हुशार ज़ेहनस, पँज़िस
साधकुसुन्द दिल यि दँप्य ज़ि ति थपि निवान छि। तिथिय छि यिमन
म्वलुजन रच़नायन हुंघ् नँव्य तर्ज़, सॉदुरवार बंग तु दिलस प्रेयिवुन्य तु
सनुवुन्य मुनॉसिब तु मुवॉफिक देव माला। यि कस अँकिस यियि न पसंद।
अथ छुनु कुनि रंगु कैह म्वलुवुन। सोम्बरनि छि सफ़ु हथ स्वादाह। प्रथ अंदु
मुक्कमल। अथ मंज छि लगभग सतुवन्ज़ाह अर्वन्ज़ाह नाना प्रकॉर्य

रचनायि । अथ छि कम्पोजिंग ति बेहतरीन तु बॅड कथ छे अथ छेनु लिपि
हुंजु गलतियि केंह । जगत् गुरु भगवान गोपीनाथ जी ट्रस्ट उदयवाला जौम
छु बजि खोशी सान छि सोम्बरन छापान ।

मे दप्योव अमि मंज कडु बु केंह शार येत्यथ दर्ज करनु गर्जु - मगर
अति अँकिस ख्वतु अख शार वुछिथ बदल्योम मन यिमन स्यठाह कम त
केंचन शारन प्यठुय करु बु इकिफा । बाकुय वुछन परन वॉल्य पानय । यिम
शार छि यिथु पॉठ्य :-

यस ड्यकस क्वंगु ट्योक गाह त्रावान ।

सुय ग्वर सोन बबु भगवान ।।

चॉन्य पाद हृदयस मंज रॅटिम ।

रुचरुक शुहुल शोहजार दिम ।।

।उँ नमो भगवते गोपीनाथाय ।

चानि पूजाये वंदय मन तु प्राण ।।

०

ही तन बु वथुरय पम्पोशि पादन ।

कन थाव नादन सत् ग्वरु हो ।।

०

बबु भगवानु सुंद ध्यानाह सोरिथ ।

दोरिथ हलम छुस पादन तल ।।

०

टाठि बबु चरणन बु प्राण वंदयो ।

चेय चेय बु लगुयो नावस चेय ।।

० ० ०

दय दियिन 'रोशि रोशि' डाक्टर साँबस कलमस

क्ववथ, व्यचारन बुबुराय तु बेखतियि रुत्य् फल बबु

भगवान कॅर्यनस हुस्चर तु पूर्यर । बु रोजस यी मंगान ।

रुत तु रुचर यछनवोल

पी०एन० कौल 'सायिल'

लेखक : डॉ. रोशन सराफ 'रोशि रोशि'

प्रकाशक : भगवान गोपीनाथ जी ट्रस्ट (रजि०

प्राप्ति स्थान : भगवान गोपीनाथजी ट्रस्ट (रजि०)

१. खरयार हब्बाकदल, श्रीनगर, (कश्मीर)
२. उद्यवाला, बोड़ जम्मू।
३. पम्पोश एन्कलेव, नई दिल्ली।
४. हस्तसाल, विकासपूरी, नई दिल्ली।

© सर्वाधिकार सुरक्षित प्रकाशन

प्रथम संस्करण प्रकाशक

लेखक : डॉ० रोशन सराफ 'रोशि रोशि'

मूल्य: 75/- रुपये

मुद्रक :

पुनर्युक्त

‘गुरु पादन तल’ भगवान गोपीनाथस तु तसुंजि अथाह कृपायि छुस
बु सासु बघन बँखुत्यन हुंघ पॉठ्य पम्पोशि पादन तल सर नोमुरॉविथ
अनुग्रह मंगान। बु गर्दि मंज अख ल्वकुट म्वकुट ज़रु बबु सुंजि बारगाहि
हलम दॉरिथ तसुन्धन रहमतक्यून निशानन म्वनि तु मीठ्य करान। बबु
भगवानु सुंदिस बजरस तु थज़रस प्यठ लेखुन गव प्रज़लवुनिस सिर्यिस
चोंग हावुन।

यि छि म्यॉन्य दौयिम भक्ति रचना य्वसु मै भगवान जियस प्यठ
लीछ। गलती आसन हतु बज़य मगर श्रद्धा तु बँखती म्यॉन्य छि न्यरमल,
य्वसु मै बबु सुंदिस नावस तु तिहुंघन पादन छि अर्पन कॅरमुच।

मै छि कूशिश कॅरमुच जि यि म्यॉन्य बँखती तु श्रद्धा करि परन
वाल्यान मस्त मदहोश तु तिम तुलन प्रथ लफ़जुक लुतुफ तिक्याज़ि म्यॉन्य
सॉरुय बँखती लय छि मुशिक अम्बर मिलविथ सुबहुकि शबनमुक्य् पॉठ्य
नॉपान तु अग्यानुक नार शेहलॉविथ शिलस तान्य् वातुनावान। पॅरिव तु
पानय अज़मॉविव।

‘रोशि रोशि’

नावि तार	2	बक्ति वत्सल	57
पीरि पीरां	5	नाद	59
चॉन्य पछ	7	आमुत शरन	60
रयन	9	छ्योनमुत मुर	62
गुप्त ग्यान	12	हलम दौरिथ	64
पँज पछ	14	दिलुक्य मुराद	66
अज़र अमर	17	जलवुगर	68
अथाह कृपा	20	ओमकार	70
चोन नाव	23	प्यालु अज़ गॅनीमथ	72
न्यसर	27	कासि हे खॉरी	74
म्योन खाब	29	ज़गतुक ग्वर	76
बोड दरबार	31	गिरदाब	78
श्रद्धा	33	पँज लीला	80
कन थाव नादन	35	तुरु पचि	81
पँज यॉरी	36	नन्यूर	83
पीरि कॉमिल	37	सतुच वथ	85
चॉन्य सथ	38	रहमतुक चुमट	88
लोलुक रंग	40	मॉर्यफतुक म्वय	89
गंज म्वहरु लाल	42	चॉन्य पाद	91
व्यनती	45	नावि तार	93
ग्वरु गीता	46	नॉली नाल	95
लोलुक अतु गथ	47	कॉमिल दवा	97
सत ग्वर	48	बारगाह	99
सबरुक समन्दर	50	मनि छुम हावनस	101
साहबि कमाल	52	छ्वपु	103
ग्वरु दया	53	बु सर नोमरिथ	104
सॉबिर तु रहबर	55	सेदिस तु शोदिस	107
		सोपुन किनु ब्रम	109

नावि तार

वोलान छु सँदरु गुथ मँच गौमुच, पैमुच नैन्द्र शांत ज़लस ।

हलकॉर्य मलखन वथ रॉवमुच, खँचमुच वुलमँन्य सँतिमिस नबस ॥

सत ग्वरु दितु मे पानय तार,

बु छुस लाचार, बु छुस लाचार ।

आवुलनि कडतम यीतनय आर ॥

बु छुस लाचार, बु छुस लाचार ॥

वावन रोटनस मंज़ दैर्ययावस,

दावस लोगहस मलखव बो ।

अंदकारन वोलनस शापस ।

दावस लोगहस मलखव बो ॥

तार दिनु वालि पानय बोठ खार ॥

बु छुस लाचार, बु छुस लाचार ॥

नावि नमस बिहिथ अँछ्य छम फोरान ।

वोरान पां व्वदर पतु दोरान ।

यतन कॅर्य कॅर्य छुसनु पोरान ।

दोरान पां व्वदर पतु दोरान ।।

दीन दयालु कांह अवतार दार ।

बु छुस लाचार, बु छुस लाचार ।।

हमतुल चोलुम नाव गॅयि यिरु ।

फिरु किथु छर्यव अथव बु नम ।।

कर म्योन चारु रठनम चिरु ।

फिरु किथु छर्यव अथव बु नम ।।

सखा चु बनतम चुय मददगार ।

बु छुस लाचार, बु छुस लाचार ।।

रुम गॅयि नावि सॅहलाब वोत ख्वरन,

करन छ्वरु छ्वरु मंज सॅदरस ।।

तालि गुल्य लॅदिथ छुस वदन ।

करन छ्वरु छ्वरु मंज सॅदरस ।।

दूरि दूरि छुख वुछान खसी मटि मार ।

बु छुस लाचार, बु छुस लाचार ।।

केंचव लाग्यहय पोश तु अरगा ।

सजिदा द्युतहय नॅमिथ केंचव ।।

केंचव अॅशिवानि द्युतहय गोडाह ।

सॅजदा द्युतहय नॅमिथ केंचव ।।

बबु भगवानु सानि बोज़ सॉन्य ज़ार ।

बु छुस लाचार, बु छुस लाचार ।।

तदबीर वनतम च़ठतम मोहु ज़ालु ।

कृपालु शेरतम कर्म लोन चुय ।।

‘रोशि रोशि’ वथ हाव चुय रखिपालु ।

कृपालु शेरतम कर्म लोन चुय ।।

थफ कॅरिथ बवसरस करुनावुम पार ।

बु छुस लाचार, बु छुस लाचार ।।

* * *

पीरि पीरां

कठिने सम्सारु गोमुत बु गीर,
वनतम व्वपाय वनतम तदबीर ।
बॅनिथ बब तु मॉज पीरन हुंद पीर ॥
वनतम व्वपाय वनतम तदबीर ॥० ॥

फॅल्य फॅल्य वॅटिम लॅदिम चंदस,
जंदस कर्योम पयवंदु नोव ।
होल होल चोलुस बॅनिथ फॅकीर ॥
वनतम व्वपाय वनतम तदबीर ॥० ॥

थरु थरु छम रतु दॉव्य पानस,
तानस तानस नीजर फ्यूर ।
बुथ फिरिथ पनुन्यव लॉयहम तीर ॥
वनतम व्वपाय वनतम तदबीर ॥० ॥

पाँचौल्य् राख्यस छिम पतु दोरान,
पोरान छुनु म्योन अडुल्योक पान ।
मोह मदु कोरव दिवान ज़ीर ज़ीर ।।
वनतम व्वपाय वनतम तदबीर ।।० ।।

वासनायि लंका छम तन्बुलावान,
ब्रमुरावान म्योन मूर्खु मन ।
हे गोपीनाथु शेरतम तकदीर ।।
वनतम व्वपाय वनतम तदबीर ।।० ।।

लूसिथ ल्वकुचार हॉरिथ जवॉनी,
रवॉनी आबशारुच स्वतेमुच ।
नटान ब्वनु जंगु तु हैरि कलुहीर ।।
वनतम व्वपाय वनतम तदबीर ।।० ।।

न्याय वॅहरॉविथ लूबक्यन थालन,
सवालन हल मेलुन मुशिकल ।
'रोशि रोशि' माफ करतम तकसीर ।।
वनतम व्वपाय वनतम तदबीर ।।० ।।

चौन्य पछ

द्वख तु दोद संकट हरतम, वरतम पादन तल,
अथु रोट मे पानय करतम, वरतम पादन तल ।
न्याय जन्मुक्य पानय कासतम, वरतम पादन तल ॥
अथु रोट मे पानय करतम, वरतम पादन तल ॥० ॥

चंदु छोन न्यथुनोन सफरस द्रामुत, रोवमुत मंज सॅहरावस,
नादार अजकार हॉरिथ आमुत, रोवमुत मंज सॅहरावस ।
संतान जॉनिथ ख्वनि ख्वनि ललुनावतम ॥

अथु रोट मे पानय करतम, वरतम पादन तल ॥० ॥

क्या करुन हतन शतन, यि छु सोरुय ब्रम,
वतन कथ चु म्वखतु छकन, यि छु सोरुय ब्रम ।
मॅशरॉविथ ऑंद पोख च्वपॉर्य बासतम ॥

अथु रोट मे पानय करतम, वरतम पादन तल ॥० ॥

कूठ सैदरु वीत नु अदि, मलखव बु कोरहोस गीर,

नाव लँजमुन्न गुथि बु गोमुत बंद, मलखव बु कोरहोस गीर ।

बवसुर आवलिनु मंज अपोर तारतम ।।

अथु रोट मै पानय करतम, वरतम पादन तल ।।० ।।

क्या करन मै बंद तु बाँय, चंदुक्य यिम सॉर्य,

मुशका हेथ पतु पतु आँयि, चंदुक्य यिम यॉर्य,

बब माँज लॉगिथ नखि डखि रोज़तम ।।

अथु रोट मै पानय करतम, वरतम पादन तल ।।० ।।

वछि वॉलिंजि मे वुहय द्रॉय, पनुन्यव मे तीर लॉय,

नॅव्य नॅव्य मे दाँद्य ज़ॉय, पनुन्यव मे तीर लॉय ।

बुलगार रहमतुक अख रछा लागतम ।।

अथु रोट मै पानय करतम, वरतम पादन तल ।।० ।।

रावु राँवुम वाँसाह यि क्युथ जन्मा, कस खारु खता,

लाग्यम कुस पनुन हैयम खबर, कस खारु खता ।

होल कोल कपालु वुछिथ कर्मलोन शेरतम ।।

अथु रोट मे पानय करतम, वरतम पादन तल ।।० ।।

मनुचन तारन नाव पनुन गनतम, बोझुनावतम म्यूठ कांह साज,

आराम तु करार दिलस अनतम, बोझुनावतम म्यूठ कांह साज ।

सूहम स्वरुनॉविथ 'रोशि रोशि' ओम खनतम ।।

अथु रोट मे पानय करतम, वरतम पादन तल ।।० ।।

* * *

र्यन

यीरान गीरान गॅछिथ परेशान, मीज्ञान रोवुम मंज बाज़रस ।

हॉरिथ दाश नदाश छुस हलम दारान, प्रारान दियम ना कांह तार सँदरस ।।

लौबुम कुला अख शुहुल तय शीतल ।

जल तु कोस्तूर करान बोल बोश ।।

द्युतुम फ्युर ख्यालन अँथ्य शेहजारस तल ।

कोरुम लुबि लुबाब कतर कतर नोश ।।

अनजान प्रेय रीत्यसं छवि मंजु जोरु जोरु,

किथु चॉन्य रयन होरु बु, किथु चॉन्य रयन होरु ।

चॉनिस लोलस येति छुनु कांह जोरु ॥

नाहकय बु फ्यूरुस वानु वानय,

पाद फोलिम गॅछ्य-गॅछ्य अस्तानय,

च्यथ दिचुम ओस क्या मे खोट बानय,

पाद फोलिम गॅछ्य गॅछ्य अस्तानय ।

मोल मॉज लॉगिथ म्वकलेयि मे दोरु दोरु ॥

किथु चॉन्य रयन होरु बु, किथु चॉन्य रयन होरु ॥० ॥

वुछतु कपालस लीखिथ क्या ओस,

गुलशानु मंजु छग लॅगिथ दरबदर गोस,

क्रकु दिय दिय मे मा शेहलि बोस,

गुलशानु मंजु छग लॅगिथ दरबदर गोस ।

वाँतिथ दार चोन ल्वत्य्व मे वोरुवोर ॥

किथु चॉन्य रयन होरु बु, किथु चॉन्य रयन होरु ॥० ॥

मन पनुन रोवुम गोस फलुवाँय,
यिम पनुन्य बाँसिम तिम व्वपर आँस्य,
रँछिमुत्य अमार वारु वारु गँयि राँस्य,
यिम पनुन्य बाँसिम तिम व्वपर आँस्य ।
दर्शनु चानि लोत्योम मनुकुय शोरु ॥
किथु चाँन्य र्यन होरु बु, किथु चाँन्य र्यन होरु ॥० ॥

क्या खबर आँसुम मशम पोत काल,
अदु क्या जान गव म्वकुल्यव सु जंजाल,
सीनु सिपर रुज़िथ हल गँयि सवाल,
अदु क्या जान गव म्वकुल्यव सु जंजाल ।
माय यिछ खनुम गछुहा नु ओरु योरु ॥
किथु चाँन्य र्यन होरु बु, किथु चाँन्य र्यन होरु ॥० ॥

युथ दिम वरदान दर्बार चोन यिम,
रछुनुक बबु ह्यतु पानय ज़िम,
बँखती हुंद खज़ानु फवति फवति निमु,

रछनुक बबु ह्यतु पानय ज़िमु ।

छुस सवाल च़ेय करान करतु बबु गोर ॥

किथु चॉन्य रयन होरु बु, किथु चॉन्य रयन होरु ॥० ॥

बहानु क्या बन्यव चानि दीदारुक,

बुछतु ज़ोर म्यानि कर्मलान्युक,

अनुग्रेह मे बन्यव पम्पोशु पादुक,

बुछतु ज़ोर म्यानि कर्मलान्युक ।

‘रोशि रोशि’ छुस बिहिथ छुम व्वन्य गछुन कोर ॥

किथु चॉन्य रयन होरु बु, किथु चॉन्य रयन होरु ॥० ॥

* * *

गुप्त ग्यान

बु बेकुल नादान बॅल्य परेशान, फेरान वानु वानु ।

अग्यानु मनस पॅरय पॅरय परान, बरान बु फुटमुत्य बानु ॥

कृपायि चानि अनुग्रह बन्धम, चल्थम मोह अंदकार ।

अग्यानु मनस ग्यान जल्थम, चल्थम मोह अंदकार ।।

नशवर काया रेंटमुच दाद्यव, जाद्यव कॅरमुच पानस कुन ।

वह्य तु वाय कॅर्य कॅर्य थॅचमुच ज्यव, जाद्यव कॅरमुच पानस कुन ।

द्यानु चानि दोद बल्थम, चल्थम मोह अंदकार ।।

सिर्यि प्रकाशस मंज छुमनु द्रेंठमान, जेठान छॅम पोहॅ गटु रात,

सौर्य सौर्य पानस छुस वछ चेटान, जेठान छॅम पोह गटु रात,

अनि गटि गाश फोल्थम, चल्थम मोह अंदकार ।।

वासनायि दोदसन छम वुनु वॉजमुच, डॉजमुच छनम पौर्यज्ञान,

लूबक्य ब्वछरन वथ रावु रॉवमुच, डॉजमुच छनम पौर्यज्ञान ।

सहरावस नागराद वुज्यम, चल्थम मोह अंदकार ।।

यि फलवा मन करान अरुसरु, दुरु दुरु करान पानस सुत्य,

सरस सरु करुनय खॅचमुच थरु थरु, दुरु दुरु करान पानस सुत्य ।

बवुसागरस अपोर तार्यम, चल्थम मोह अंदकार ।।

अपोर गोमुत पाठ पर्य पर्य, दर्य दर्य वोथमुत मागस द्राग,
 राँव्यमुत्य दानु क्रेया कॅर्य कॅर्य, दॅर्य दॅर्य वोथमुत मागस द्राग ।
 सूहमकुय मंत्रु पर्यम, च़ल्यम मोह अंदुकार ।।

मरुनुक मरु मरु त्रॅहॅरावान, खोच़ुनावान कालुन बय,
 वदनु ब्रोंदुय वदुनावान, खोच़ुनावान कालुन बय ।
 'रोशि रोशि' वसवास गल्य्म, च़ल्य्म मोह अंदुकार ।।

* * *

पैज़ पछ

कर सखर पानु गछ़ दर्बार, दार हलम प्रथ शबस ।
 पम्पोशु पादन तल छाव शेहजार, ज़ारुपारु कर बबस ।।

वाति वख वसि बारां, कर जिगर रोज़ हलम दारान ।
 मेलि हख युस आसि प्रारान, कर जिगर रोज़ हलम दारान ।।

फुटिथ दिल गछ्यख पाश पाश, क्या थावख अँशिस हिसाब,
ओश हारान रावी गाश, क्या थावख अँशिस हिसाब ।
नादानु क्याजि छुख पान मारान, कर जिगर रोज़ हलम दारान ।।

जंग तुल बद रंगु चमे, रंग खार पानस लोलुक,
खम त्राव अदु मन हमे, रंग खार पानस लोलुक ।
अछ अन्दर रोज़ दय गारान, कर जिगर रोज़ हलम दारान ।।

कुठि कुठि फेर अँन्दर मनस, स्वनस र्वपस दि लथ होर कुन,
छौराह दि गँनिस जंगलस, स्वनस र्वपस दि लथ होर कुन ।
बबु संजि खाव रोज़ अशि छलान, कर जिगर रोज़ हलम दारान ।।

सोदागार परमानु छिय छैन्य, क्या चु तोलान क्या कुनान,
वस बाज़र तति डलनय पँन्य, क्या चु तोलान क्या कुनान ।
कथ चु सरतलि छुख कारान, कर जिगर रोज़ हलम दारान ।।

रोज़ु दैर्य दैर्य लोसी पान, कथ छुख च़ु दोह गँज़रान,
 कर च़ु लोलु सुत्य लोलस ज़ान, कथ छुख च़ु दोह गँज़रान ।
 लोलु सुत्य रोज़ लोल बॉगरान, कर जिगर रोज़ हलम दारान ।।

शहन प्यठ क्या यखतियार, अख च़्यहु गछ़ान वुफ दिथ,
 शाह गोव हाह चलान जानावार, अख च़्यहु गछ़ान वुफ दिथ ।
 छा़यन कथ पतु पतु दोरान, कर जिगर रोज़ हलम दारान ।।

स्वनु रवपु मालु छुन कँडिथ, नाहकय नेरख अँट्य अँट्य,
 'रोशि रोशि' रोज़ खँटिथ, नाहकय नेरख अँट्य अँट्य ।
 येछ़ि पछ़ि रोज़ दामानु वहरान, कर जिगर रोज़ हलम दारान ।।

* * *

अज़र अमर

हारु बॉश्य ज़ामुत सॉबिर खज़ानु, पानु भगवान आमुत ज़न्मस ।
चावनि आमुत लोलु पयमानु, मयखानन बॅरिथ मॉर्यफ्तुक मस ॥

गवहर गवहर रोयि अज़हर,
नॉपान व्वशलान आफताबि अतहर ।
जवहर जवहर बॉगरान हर पॅहर,
नॉपान व्वशलान आफताबि अतहर ॥

रेश्य वारि हुंद मॉर्य मौंद दुदीनु,
थज़ि जायि बिहिथ छु पानु शाहानु ।
नारानु सुंद अमीन हारु मालि हुंद निशानु ।
थज़ि जायि बिहिथ छु पानु शाहानु ।
सतुकुय प्रकाश च़े लोलुक तच़र ॥
नॉपान व्वशलान आफताबि अतहर ॥

साफु गंडुनि आमुत पानु बह्ना ।

पिलुनॉवमुच्च शंकरन पनून्य म्वहर,

नॉपान व्वशलान आफताबि अतहर ।।

क्वलराद पादन तल डखिस बून्य,

ज़ॉजमुच्च मलंगन मनकलि दून्य ।

छेत्रु कनि राम राम बॅदरुन्य दून्य,

ज़ॉजमुच्च मलंगन मनकलि दून्य ।

चोनुय प्रागाश गामु शहर,

नॉपान व्वशलान आफताबि अतहर ।।

माजि कॅशीरि हुंद नुन्दु बोन,

ज़गतन युस भगवान मोन ।

वन्दस जुव जान तय कबीलु क्रोन,

ज़गतन युस भगवान मोन ।

ऑही बब करान शामु सहर,

नॉपान व्वशलान आफताबि अतहर ।।

होवर्यव होवर्यव बॅखुत्थयिधान,

स्वमनु ज़ारु पारु करान ।

चानि बारगाहि कांह नु खॉल्य नेरान,

मनुक्य अबिलाश छिख पूर गछान ।

‘रोशि रोशि’ ख्यावान बॅख्ती हुंज तँहर,

नाँपान व्वशलान आफताबि अतहर ॥

* * *

अथाह कृपा

बॅनिथ बुलबुल ग्यवुहा तरानु, नावु चान्युक सुबह शाम बो ।

म्वय बु चमुहा लोलु पयमानु, मस रोज़हा दोह राथ बो ॥

डोख चोन शीतल सर्वकुल,

शेहजार वातुनावान शुहुल ।

दार चोन स्वर्गु खोतु मॅछ्युल ॥

शेहजार वातुनावान शुहुल ॥० ॥

आबशार लोलुक चानि दरबारु,
वारु वारु शेहलावान अग्यानुक नार ।
द्वख तु दौद्य बलान चानि व्यचारु,
वारु वारु शेहलावान अग्यानुक नार ।
चानि सुमरनि फवलान अडु फॅल्य गुल,
शेहजार वातुनावान शुहुल ॥० ॥

सूर करान छुख अलायन बलायन,
न्यायन छुख कासान चुय ।
गालान छुख चुय आपदायन,
न्यायन छुख कासान चुय ।
अनि गटनुय करान दुहुल,
शेहजार वातुनावान शुहुल ॥० ॥

चानि नावुक येम्य कोर दान,
हान चॅज तस जन्मन हुंज ।
चानि खावि येम्य कोर हवालु पान,

हानि च जे तस जन्मन हेज ।

लोब तँम्य गवहर म्वलुल,

शेहजार वातुनावान शुहुल ॥०॥

चॉनिस नावस अथाह अनुग्रेह,

वेह च़लान मोह मदुकुय ।

चानि लोलुक वातान छुश्रेह,

वेह च़लान मोह मदुकुय ।

वदुवन्य असान ज़न सोतु सुम्बुल,

शेहजार वातुनावान शुहुल ॥०॥

म्वय युस चवान चानि म्वयखानु,

पयमानु रोज़ान नु खॉल्य तस ज़ांह ।

मस गॅछिथ वनान बबु भगवानु,

पयमानु रोज़ान नु खॉल्य तस ज़ांह ।

प्रथ कतरु मॉर्यफत रॅस्युल,

शेहजार वातुनावान शुहुल ॥०॥

अख ज़रा मनकलि हुंद,
मॉर्य मोंद करिह्यम तन मन ।
बनिह्यम बाव 'रोशि रोशि' स्वनु सुंद,
मॉर्य मोंद करिह्यम तन मन ।
गछ्यम प्वख्तु यि लोल ऑव्युल,
शेहजार वातुनावान शुहुल ॥०॥

* * *

चोन नाव

अख नाव चोन दिवान सोथ समंदरस,
सँहलाबस शोपरावान खास्यून मंज़ ।
कृपायि चानि तार लगान बवु सरस,
गरस गरस बरु प्यठु स्वनु सुंद कंज़ ॥

रॉछ्य थावुम पनुनि बडि नावुक,
लोलु चान्युक छुम तमनाह ।
सायि थावुम पनुनि बडि सायुक,
लोलु चान्युक छुम तमनाह ॥

ग्योनी, द्योनी मानान च़ेय,

त्रन ज़गतन मंज़ छुय नु कांह सौनी,

ग्योनी द्योनी मानान च़ेय ।

ग्यान दितम मन हैछिनावनुक,

लोलु चान्युक छुम तमनाह ।।

फीर्य फीर्य वानु वानु गॅछ्य गॅछ्य अस्तानन,

सुबहन शामन दित्यमय वॅन्य ।

छोरमख ननुवोर शहरु गामन,

सुबहन शामन दित्यमय वॅन्य ।

गाश दितम सु नूर प्रज़नावनुक,

लोलु चान्युक छुम तमनाह ।।

सोरुय मॅशरिथ आस चानि बारगाहि,

जायि जायि वुछमख लोल बाॅगरान ।

मॉर्यफतुक खुमार खोत मे ग्रायि ग्रायि,

जायि जायि वुछमख लोल बॉगरान ।

चाव अमर्यथ शेहलि स्वबावुक,

लोलु चान्युक छुम तमनाह ।।

ओम नमो भगवते गोपी नाथाय,

माये चानि वोलनस बो,

बिहिथ छुख थज़रस पानु बडि पाये,

माये चानि वोलनस बो ।

बाव दितम लोल बॉगरावनुक,

लोलु चान्युक छुम तमनाह ।।

अग्यानु सहरावस वुज़िह्यम नागराद,

व्याद चलिह्यम बेकुल मनस,

चानि कृपायि गछुहा शाद,

व्याद चलिह्यम बेकुल मनस ।

अनुग्रेह कर मन वुज़ुनावनुक,

लोलु चान्युक छुम तमनाह ।।

अछ मेछ दुविथ बेखुत्य प्रथ दीहियवान,

प्यवान परन छिय पादन तल,

अशिचे चालु ज़ार बोज़ुनावान,

प्यवान परन छिय पादन तल ।

ह्यतु ज़िमु दौद्य बलुरावनुक,

लोलु चान्युक छुम तमनाह ।।

त्रेय वुछनुक छुम अख गमा,

शमा ज़ोलमुत मे चानि नावुक,

‘रोशि रोशि’ अनतम अमारन जमा,

शमा ज़ोलमुत मे चानि नावुक ।

चाव थावुम पनुनि चिकु चावुक,

लोलु चान्युक छुम तमनाह ।।

* * *

न्यसर

यॅन्दरस ओछ खारि ह्यम, येन्य वोनिह्यम दोर पन ।

छानि परिनिनि छथ नेरिह्यम, प्रजुलिह्यम मनु म्वख्तु हन हन ॥

मन म्योन वुजुनावतन साँ नेन्दरे,

तोर दिथ शोंगमुत बरमन्दयानन ।

ज़ीर दितम युथ नु देह हॅन्दरे ॥

तोर दिथ शोंगमुत बरमन्दयानन ॥०॥

त्रोपरिथ दारि बर हॉन्कुलु कर्यम अँन्यखलि,

थलि थलि वुछुम लबन कुन ।

आवसेमुच्च तु खेमुच्च सॅन्दरे,

तोर दिथ शोंगमुत बरमन्दयानन ॥०॥

प्रानवारु सोम्बराव्य्म कॅजमख काह,

तहु-तहु थाव्य्म अख अँकिस चूरि ।

रोफ कॅरिथ पॅजर्यम ज़चि ह्वछि अँदरे,

तोर दिथ शोंगमुत बरमंदयानन ॥

मनकल वासनायन हुंज गोठ वोरिथ वुहान,

व्वथान मुशका अडु छॉविस ।

हम खम अपजुय दज्जान नारु तौंदरे ॥

तोर दिथ शोंगमुत बरमन्दयानन ॥

च्यथ स्वरान क्याहतान्य वरताव ब्योन,

चोन दिवान खास्यव ज़हरि अलमास ।

ऑख्य ऑख्य ज़ेवि करान कथु मोदरे ॥

तोर दिथ शोंगमुत बरमन्दयानन ॥

अनि गटि ब्योला वोवुम फुट्यमुतिस,

नॅटिस बोरुम मेचि कनि सीमाब ।

तेज़ाबस आब कर युथ नु पम्पोश हॅन्दरे ॥

तोर दिथ शोंगमुत बरमन्दयानन ॥

दोह व्वन्य सोरि, यियि रुत काला,

शाला दुंगु दियि बरस कुन ।

ऑखुर शांद करन हॉफिज़ु स्वन्दरे ॥

तोर दिथ शोंगमुत बरमन्दयानन ॥

नितम द्यानु वानस खारतम कँहवचे,

लछे ग्यानु टासु नेर्यम वर ।

‘रोशि रोशि’ खारतम ओछ पन यँन्दुरे ॥

तोर दिथ शोंगमुत बरमन्दयानन ॥

* * *

म्योन खाब

दीदार गोव मे चोन,

अज़ खाब पूर गव म्योन ।

दरबार लोब मे चोन,

अज़ खाब पूर गव म्योन ॥

वॉन्सा रॉवुम प्रारान प्रारान,

छारान छारान छेनिम खोर ।

अर्मीन ओसुम प्रोन,

अज़ खाब पूर गव म्योन ॥

खँसिथ कोहा चँटिथ कुहा,

दोहा रावु रॉविथ आस ।

बुछुम नूराह प्रज़ुलवोन,

अज़ खाब पूर गव म्योन ॥

गाशी गाश अमिनादि तुलुन, तुलुन मालु मंज प्रागाश ।

वुछुम चलान जून ग्रोन, अज खाब पूर गव म्योन ।।

लुखुय लुख वुछिम च्वपौर्य, हौर्य हरदु मागु सोंतय ।

दपान बब सोन नुन्दुबोन, अज खाब पूर गव म्योन ।

खामोश र्योशा मंज दानस, ग्यानाह द्वछि द्वछि बॉगरान ।

अकि नजरि शेरान कर्मलोन, अज खाब पूर गव म्योन ।

केंचव अँनिहय पोशु फ्वतराह, छंतरहा गोंड हय केंचव शेरि ।

केंचव वोन्दुहय कबीलु क्रोन, अज खाब पूर गव म्योन ।

चानि कृपायि शाप चलान, गलान 'रोशि रोशि' अंदुकारस न्याल ।

बब कुलि आलमन भगवान ज़ोन, अज खाब पूर गव म्योन ।

* * *

बोड दरबार

चुय ब्रह्मा चुय महेश्वर, ननिवानु नारायण चुय,
चुय मोल मौज चुय ईश्वर, पौन्य पानु भगवान चुय।
यिवान ननुवौर्य प्यवान पादन, व्यौज्जन दपान कासान चुय।
लोलु हँत्य दवान दोरान न्यथ प्रबातन, सैद्यन तु सादन रछान चुय॥

ओम नमो भगवते गोपी नाथाय,
चानि पूजाये वन्दव मन तु प्रान।
बजि बारगाहि आमुत्य पजि श्रद्धाये॥
चानि पूजाये वन्दव मन तु प्रान॥०॥

बैखुत्यन आश चौन्य चौनी छख सथा,
वथा असलुच हावतख कांह।
तार दितु बवसुर पनुनि यछाये॥
चानि पूजाये वन्दव मन तु प्रान॥०॥

केंचन रूगन शफा केंचन दाद्यन दवा,
केंचन रवा गोछ लोलु अमर्यथ।
सूर मनकलि हुंद सारिनुय बैलुरावे॥
चानि पूजाये वन्दव मन तु प्रान॥०॥

डौंरुह्य ह्यथ धियान सोलु च हतु वेंद्य,
वेंद्य वेंद्य बोझनावान हाल दिलुकुय ।
अशि सुत्य गोड दिवान न्यरमल खावे ।।
चानि पूजाये वन्दव मन तु प्रान ।।० ।।

सँदरहा कठ्युन छुख वोरुवोर करान,
तुलान गतु ग्यूर आवलुन छुख ।
नमरठतु पानय यथ बवुसरु नावे ।।
चानि पूजाये वन्दव मन तु प्रान ।।० ।।

मोल चुय मॉज चुय छुख भगवान,
बख्शान चु पापन तु शापन छुख ।
अनुग्रेह चोन वातान जायि जाये ।।
चानि पूजाये वन्दव मन तु प्रान ।।० ।।

व्यचारन शोदी बेकलस ब्वदी,
ख्वदी दितु पथुर पेमुत्यन ।
अथु रोट कर पनुन पनुनुय प्रजाये ।।
चानि पूजाये वन्दव मन तु प्रान ।।० ।।

स्यज़रुक तु पज़रुक प्रज़ुलवुन दरबार,
वार व्यसतार दिवान रुत्यन कारन।
पम्पोशु पादन तल आराधनाये ॥
चानि पूजाये वन्दव मन तु प्रान ॥०॥

चोन नाव सुबुह शाम स्वरव ना परव ना,
जरव ना लोलु सुत्य सुमरन चॉन्य।
'रोशि रोशि' युथ खसि खुमार ग्रायि ग्राये ॥
चानि पूजाये वन्दव मन तु प्रान ॥०॥

* * *

श्रद्धा

फ़क हँत्य दकु ज़द गॉमुत्य परेशान,
छारान जाय शिहिज तु शीतल।
फीरिथ वानु वानु गॉमुत्य पशेमान,
दपान करि ना कांह मुशिकलन सँहल ॥

ननुवॉर खनिचौराव नमह वंवान, दामानु चोन रटनि आये ।

दवान दोरान अँछ्य मूरान, दामानु चोन रटनि आये ॥

गँन्डिथ होल कोरुख यतन, त्रटन मंज मेन्यख वतु ।

नु खूच्य वुजमलन नु गगुरायन, अनि गटि मंज प्रकाश छारान ॥

दामानु चोन रटनि आये ॥०॥

प्रजलवनि बारगाहि नूरय नूर, दूर करान युस अंदकार ।

बबु भगवानु सुंद प्रचंड पूरि पूर, ग्यानु द्यानुक वरदान छारान ॥

दामानु चोन रटनि आये ॥०॥

सुबह शाम च़ेय व्यनती करान, स्वरान तु परान अख चोन नाव ।

चानि सुमरनि हुंद दोह दरान, पम्पोशु पादन चान्यन छारान ॥

दामानु चोन रटनि आये ॥०॥

हालि दिल केंह च़ूरि बावान, हावान केंह ज़ख्म पनुन्य ।

केंह दम फुट्य व्वश त्रावान, द्वखु ज़द दाद्यन दवा छारान ॥

दामानु चोन रटनि आये ॥०॥

न येति कांह बंद न काह बादव, दादव च़खरु माडमय करमुच़ ।

रुखु पॅन्ज़्यूवरकन दित्यमुत्य खांदव, बे वसीलु चोन अनुग्रेह छारान ।।

दामानु चोन रटनि आये ।।० ।।

लोलु हत्यन बस सथ अख चॉनी, सॉनी छुनु येति कांह च़ेय ।

‘राशि रोशि’ च़ेय लोल बाँगराँनी, ग्याँनी द्यॉनी न्यमान च़ेय ।।

च़ुय बब माँज च़ुय भगवान, दामानु चोन रटनि आये ।।० ।।

* * *

कन थाव नादन

ही तन बु वथुरय पम्पोशु पादन, कन थाव नादन सत ग्वरु हो ।

शाद कर बबु सानि दिल ना शादन, कन थाव नादन सत ग्वरु हो ।।

ट्योठ छु जामु चमु कमि बानय, पानय करतम जहरस अमर्यथ ।

च़ाँपिथ अलमास पतु क्वसु लादन, कन थाव नादन सत ग्वरु हो ।।

ननुवाँर फीर्य फीर्य छ्वकु लद गॅयस, पेयस थॅकिथ तु छेनिथ बो ।

अँछव खून हारान बोज़ पॅर्ययादन, कन थाव नादन सत ग्वरु हो ।

नशतर ह्यथ लोरीन पतु पतु, रतु दोव्य करनस सम्सारन बो ।
 सूर मनकलि हुंद दवा सेधन तु सादन, कन थाव नादन सत ग्वरु हो ॥

चानि कृपायि मरु मरु चलयम, यियम अंग जख्मन प्रान्यन ।
 सथ मे थाव पनुनी गंड करुम यरादन, कन थाव नादन सत ग्वरु हो ॥

द्यानु चानि व्यचारन शोदी, ग्यानुचु ब्वदी लगान खँहरन ।
 शीतल अमर्यथ वुजान नागरादन, कन थाव नादन सत ग्वरु हो ॥

चेय मंज सूहम चेय मंज ओमकार, सरशार बानु चोन अनुग्रेहकुय ।
 'रोशि रोशि' वातान चु सान्यन दादन, कन थाव नादन सत ग्वरु हो ॥

* * *

पँज यॉरी

पोशे गँन्ध वहरावस पादन, नादन म्यान्यन बब थाव गोश ।
 व्युह गाह बु वहरस पम्पोशि पादन, नादन म्यान्यन बब थाव गोश ॥

लोलुक मस गलि गलि चावन, ख्यावन सति सिनि लोलुय लोल ।
 लोलु अशि खोर बु छलस नागरादन, नादन म्यान्यन बब थाव गोश ॥

थज़रस थ ज़ुरय त्रावि लोलु नज़राह, स्यज़राह कॅरिहेम हल्यून कर्मन ।
 सुबह शाम सनुम्वख करस आरादन, नादन म्यान्यन बब थाव गोश ॥

कासि प्रॉन्य खारी करि पंज यारी, नदीरी त्रिलि अद हथिय ।

गछि मोल मेहरबान दिलि नाशादन, नादन म्यान्यन बब थाव गोश ।।

राशय म्यानि त्रावि नोव हाशे, चाशे ग्यानुच लेख्यम कर्म फल ।

करि माफ म्यान्यन सारिनुय अपरादन, नादन म्यान्यन बब थाव गोश ।

चँटिथ प्रॉटिथ सीनु हावस, थावस ब्रॉह कनि हाल पनुनुय ।

अनि गटि गाश अन सेद्यन तु सादन, नादन म्यान्यन बब थाव गोश ।

लोलुकि आगरु मॉर्यफत चाव्यम, 'रोशि रोशि' बाव्यम ब्रह्म ग्यानुक सीर ।

पूरु करि लोलु सान प्रान्यन वादन, नादन म्यान्यन बब थाव गोश ।

* * *

पीरि कॉमिल

पीरन हुंदि पीरु बोज़ सदा, गदा आमुत्य बरस तल ।

वछि वॉलिंजि करान फॅर्यादा, गदा आमुत्य बरस तल ।।

वक्तन मॉत्रॉव्यमुत्य छि लूख, नु ह्यस कांह नु होश छुख ।

तंबलेमुत्यन बोज़ सदा, गदा आमुत्य बरस तल ।।

द्वखन दाद्यन हुंद अम्बार, वदुवन्यन ज़ख्मन वुहान नार ।

आश हॉर्यमुत्यन बोज़ सदा, गदा आमुत्य बरस तल ।।

नाल वोलमुत शापु शहमारन, बे सहारन छु जहर आपरन ।

थॉन्थरेमुत्यन बोज़ सदा, गदा आमुत्य बरस तल ।।

पाफु कंड्यव वथ रेंटमुच, तन मन रतु दौव्य कॅरमुच ।

वति रौव्यमुत्यन बोज़ सदा, गदा आमुत्य बरस तल ।।

नापायिदार सम्सारुक सफराह ज्यूठ, तरुन सॅदरस बासान कूठ ।

पथर पेमुत्यन बोज़ सदा, गदा आमुत्य बरस तल ।।

रटुख शुर्य बौच दामनस तल, 'रोशि रोशि' करुख सख्ती सॅहल ।

लछि गौमत्यन बोज़ सदा, गदा आमुत्य बरस तल ।।

* * *

चौन्य सथ

बु प्रारान डेडि तल कुति कालु, जालु खचमुच छम प्रौर्य प्रौर्य ।

बर चु मुचराव बबु त्राव मलालु, चालु किथु दूरुक्क्य बौर्य ।।

प्रारान बु छुस बर तल, वरतम बबु पादन तल ।

वौथ त्राव बर जल जल, वरतम बबु पादन तल ।।

सुबह शाम यथ दरबारस, आमुत बु दीदारस,

सरतलि मे गछि पारस, आमुत बु दीदारस ।

मुशिकलन बन्यम सँहल, वरतम बबु पादन तल ।।

अग्यानुक नार ह्योतमुत, कायुर देंजिथ प्योमुत,

क्रेहन्यार छुनम मोथमुत, कायुर देंजिथ प्योमुत ।

शेरतम अदल वदल, वरतम बबु पादन तल ।।

क्वसु नैन्दुर कुस आराम, तन मन छुम बेराम,

अनुग्रेह सुत्य करतम राम, तन मन छुम बेराम ।

कास्तम मनुच गांगल, वरतम बबु पादन तल ।।

जंजालु ज़ालस मंज़, गोमुत बु बन्द सेमंज़,

बोराह प्यठु बाह पल कंज़, गोमुत बु बन्द सेमंज़ ।

गौमुच मे अँदरुखल, वरतम बबु पादन तल ।।

मनकलि हुद सूर औशद, प्रकरँ च करान शवद,

थावान डंजि शवद ब्वद, प्रकरँ च करान शवद।

खाव चॉन्य छिम अँछन तल, वरतम बबु पादन तल।।

मोठमुत मे दीन दुन्या, च़ेय निश वातुनुक छुम तमाह,

‘रोशि रोशि’ बुदज़ु हॉ शमा, च़ेय निश वातुनुक छुम तमाह।

द्रामुच़ मे छम चॉन्य कल, वरतम बबु पादन तल।।

* * *

लोलुक रंग

लोलु व्यूगाह दरबारस वॅहरावय, त्रावय सर पादन तल।

ओमकारुक कूल बरस खारय, त्रावय सर पादन तल।।

आबशारस शौहजार प्रचंड आफताबस,

महताबस वनु प्रवु त्राव पूर।

राम राम बॅदरुन्य दून्य पॉरावय,

त्रावय सर पादन तल।।

पम्पोरि डलु खारु बेयि ध्वस्तु नवुन,
पवलवुन ग्वलाब अनु बेयि यॅम्बरज़ल ।
लोलु सान वतन वथुरावय,
त्रावय सर पादन तल ॥

मस खॉस्य् बॅर्य बॅर्य लोलुक्य थावय,
आपरावय गलि गलि लोलुय लोल ।
थलि थलि वुछय वारु वारय,
त्रावय सर पादन तल ॥

गंगु बलु अमर्यथ श्रूच सोम्बराँविथ,
छॉरिथ कोसम स्वर्गु दारुक्य ।
लोलुके रंगु पान रंगुनावय,
त्रावय सर पादन तल ॥

दारय दान दोह रात चोन ।

नागराद फवल्यम सँहरावय,

त्रावय सर पादन तल ॥

चलि जूनि ग्रोन नोव तु प्रोनय,

चोनय नाव प्रजलि च्वपॉरय ।

‘रोशि रोशि’ बारगाहि हलम दारय,

त्रावय सर पादन तल ॥

* * *

गंज म्वहरु लाल

मनि मंज मे लोल चोन गंज म्वहरु लाल,

अकि रचि छुस गछान माला माल ।

अख अख दान चोन करान छुम निहाल ॥

अकि रचि छुस गछान माला माल ॥०॥

सुबह शाम सुसर लजमुच मे दिलसुय,

शिलसुय अन्दर्य वोथमुत म्यूठ दोद ।

अमि दादि बलुन बासान महाल ॥

अकि रचि छुस गछान माला माल ॥० ॥

दोह राथ मे ब्राँत्य् चॉनी गछान,

बासान मे छायन चोन अनुहार ।

चानि यछायि छ्यनान मोह मदुक्य जाल ॥

अकि रचि छुस गछान माला माल ॥० ॥

अनकथ वूर्य-वूर्य नेन्द्रि मंजु यिवान,

निवान जन राजु होजु दूर अजब दीश ।

स्वर्गीह मॉर्य मोंद वुछान बे मिसाल ॥

अकि रँचि छुस गछान माला माल ॥० ॥

सति सिनि ख्यमु क्या सरतलि बानन,

देवानन ब्वछि गॉमुच कोफूर ।

अख अनुग्रेह तसुंद न्यामुच हुंद थाल ॥

अकि रचि छुस गछान माला माल ॥० ॥

यि कमि खुमारु मदहोश बु गोमुत,

चोमुत कमि मंजु युथ म्वय ।

मॉर्यफतुक मस मै चावान कलवाल ॥

अकि रचि छुस गछान माला माल ॥०॥

न छुम गम अँज्युक न कल पगुहुच,

लोलच सथ फकथ सनिदान ।

अर्शु प्यठु फर्शस प्रज़लान चोन जमाल ॥

अकि रचि छुस गछान माला माल ॥०॥

चोन लोल गटु पँछ जूनु पँछ ज़ोतान,

गालान 'रोशि रोशि' अन्दकार छुम ।

बाँगरान नूर चोनुय जलाल ॥

अकि रचि छुस गछान माला माल ॥०॥

* * *

व्यनती

सँदुर ओन सोन आँस वँहरिथ, चौरिथ बुमबु हमान खमान ।
मँत्र गतु न्यरमलस असमानन खौरिथ, छ्वकविथ छोम्बिथ पाश पाश करान ॥

नुरफीका नु शफीका दँछिन्य खोवुर्य, वोवुर्य क्वकॉर्य दोनान कर्मलोन ॥
हलमस गँन्डिथ यिवान वाँसि हुंघ खुर्य, दपान बबस करतु चारु सोन ॥

स्वरान परान अख मंत्र अजर, अमर युस अर्शु प्यठु फर्शस ।
न्यमान गोड दिवान चलान ब्रँच कजर, ग़ज़ान अख नाव च्यथ विमर्शस ॥

मंदरन असतानन त्रोवुम गछुन, नंगय नचुन ह्योतुम ननुवोर ।
पोज़ गव सोपुन बैयि वाख तु वचुन, वजुन ह्योतनम सोज़ अपारि यपोर ॥

वसुवुनिस रूदस तु तावि तच्चि, रज़ि रोसतुय बँखुत्य् यिवान दवान दोरान ॥
मन फलवाह रँटिथ श्रदायि कच्चि, रच्चि रच्चि अहंकार तु अहम गलान ॥

कँह अशिवानि पाद छलान, कँह आलवान पान ग्वरस ।
कँह 'रोशि रोशि' लोलस लोल बरान, कँह पोंपुर बैनिथ गथ करान शमहस ॥

* * *

ग्वरु गीता

टाठि बबु चरनन बु प्रान वन्दयो, च़ेय च़ेय बु लगयो नावस च़ेय ।
 जुव तु जान पादन चान्यन वंदुयो, च़ेय च़ेय बु लगयो नावस च़ेय ॥

 ज्ञानुक समन्दर ग्वरु गीता, गाथा सतुच वरुतावान ।
 ग्वरु व्वपदीशस कन दारयो, च़ेय च़ेय बु लगयो नावस च़ेय ॥

 प्रेयमुक सार बॉगरान सादाह, शारदा माजि निश दान दॉरिथ ।
 लोलुक बानु ह्यथ प्रथ जन्मु प्रारयो, च़ेय च़ेय बु लगयो नावस च़ेय ॥

 शिवुय शिव कॅन्य ह्युव बन्योमुत, सन्योमुत पूरि पूर परमु शिवस ।
 कृतिस कालस छ्वपु चॉन्य ज़रुयो च़ेय च़ेय बु लगयो नावस च़ेय ॥

 बोज्ञान ज़ार सॉन्य चिलमा रॅटिथ, ज़ॉलिथ मनकल कासान अंदुकार ।
 दॉन्य् दॉन्य् सूर पानस मलुयो, च़ेय च़ेय बु लगयो नावस च़ेय ॥

 आमुत गदा चानि बारगाहि, दयायि चाने हलम दारान ।
 चानि करुनायि बु बवुसरु तरुयो, च़ेय च़ेय बु लगयो नावस च़ेय ॥

 पांन्नन गुर्यन प्यठ पांन्नॉल्य काव, टाव टाव करान वोरान दोह रात ।
 रथु वासनायन हुंद च़ेय हवालु करुयो, च़ेय च़ेय बु लगयो नावस च़ेय ॥

 यि कॅछा द्युतथम ती करु बु अर्पन, सुबहन शामन दुर चोन दान ।
 चोनुय मंत्र 'रोशि रोशि' परुयो, च़ेय च़ेय बु लगयो नावस च़ेय ॥

लोलुक अतु गथ

ज़गत सोरुय वनान छुय कुनी कथ, सथ असि चॉनी सत ग्वरो ।

प्रज़लवुन नाव चोन शीतल व्यथ, सथ असि चॉनी सत ग्वरो ।।

वुज़मलन गगुरायन तु रूदु त्रटन, गटन मंज़ युस प्रज़लावान गाश ।

सुय नूर गाशिरावान वथ, सथ असि चॉनी सत ग्वरो ।।

नारु त्योगंल ठॉन्ठर वानुक्य, अपुज्य जहानुक्य स्वनर तु खार ।

परि निनि छानि सतस कडान छथ, सथ असि चॉनी सत ग्वरो ।।

लोसवुनि शामु पोशुवुन नार, ग्राव येमि सुत्य चलान जन्मन हुंज़ ।

बबु सुंद नाव भगवानु सुंज़ अरजथ, सथ असि चॉनी सत ग्वरो ।।

आगुर्य आबस रोवमुत शबाब, तेज़ाब ज़न मिलविथ आबशारन ।

त्रेय रोस कुस करि न्यरमल सॉन्य च्यथ, सथ असि चॉनी सत ग्वरो ।।

वोलेमुतिस सँदरस मंज़ चॉन्य खाव, नाव बॅनिथ बवुसागरस दिवान तार ।

पूज़ान त्रेय सॉरी करान पादन गथ, सथ असि चॉनी सत ग्वरो ।।

योसु मनकल सुबह शाम वुहान, ज़ालान वासनायन स्वय करान सूर ।

‘रोशि रोशि’ चु बाँगरान लोलुक अतु गथ, सथ असि चॉनी सत ग्वरो ।।

* * *

सत ग्वर

वावु सुबहकि गछ ग्वरु दरबार,
न्यरमल शीतल तति अमर्यथ दार ।
पादव तॅल्य् वसान लोलु आबशार ॥
न्यरमल शीतल तति अमर्यथ दार ॥० ॥

सत ग्वर म्योन छु बडि पायि,
सरमायि सारि जगतुक सुय ।
प्यालु लोलुक तसुंद सरशार ॥
न्यरमल शीतल तति अमर्यथ दार ॥० ॥

कुम्युर कोस्तूर सुबहॉय पिचान,
ग्यवान पोशिनूल गूव्यंदुगू ।
संगरमालन सिरयि करान नमस्कार ॥
न्यरमल शीतल तति अमर्यथ दार ॥० ॥

तति ॐ तति सूहम ग्रज्ञान,
वज्ञान सुबह शाम साजु संतूर ।
न्यराकार तति गछान साकार ॥
न्यरमल शीतल तति अमर्यथ दार ॥० ॥

तति जूत्याह अखंड मनकलि दज्ञान,

गछान सूर अग्यानु हैंगरन ।

ग्यान शैहलावान अग्यानुक नार ॥

न्यरमल शीतल तति अमर्यथ दार ॥० ॥

तति हकीमि कॉमिल बॉगरान शफा,

दवा दाद्यन ति दिवान सुय ।

बलान अनुग्रेहि सूत्य दिलि बेमार ॥

न्यरमल शीतल तति अमर्यथ दार ॥० ॥

तस रोयि महताबस जोशि आफताब,

बे हिसाब पशपान नूरुय नूर ।

दीदार तसुंद शुहुल शैहजार ॥

न्यरमल शीतल तति अमर्यथ दार ॥० ॥

आचार व्यचार किन्य छुस न्यमान,

प्यवान पादन तस सत ग्वरस ।

‘रोशि रोशि’ दिवान छु बवु सरस तार ॥

न्यरमल शीतल तति अमर्यथ दार ॥० ॥

* * *

सबरुक समन्दर

रवपु सुंद दस्तार स्वनु सुंज खाव,
पौराव येंदराजुन हन हन ।
मलमल जॉविज मुनुल दोबि द्राव ॥
पौराव येंदराजुन हन हन ॥० ॥

राजु र्योश बिहिथ राजु तख्तस,
बख्तस सॉनिस कासान खुर्य ।
यंत्र तु मंत्र येम्य सुंद नाव ॥
पौराव येंदराजुन हन हन ॥० ॥

मस्तानु मॅस्ती मंज चिलमा रॅटिथ,
वॅटिथ तु चॅटिथ जंजालुक्य ज़ाल ।
सबरुक समन्दर ह्यथ शुहुल स्वबाव ॥
पौराव येंदराजुन हन हन ॥० ॥

दज़ुवन्य मनकलि गालान गांगल,
हांगल मनुक्य गछान मदहोश ।
बडि दरबारुक बोड चिकु चाव ॥
पौराव येंदराजुन हन हन ॥० ॥

आफताब रोवयस नपुवुन प्रकाश,

प्रागाश नवि सुबहुक प्रज़लान ।

नाव शीतल नवि सोंतुक वाव ॥

पॉराव यॅन्दराज़ुन हन हन ॥० ॥

न ज़ीरु ज़बर न डखु किजि,

ऑव्यजि ज़ॉव्यजि कथु वनिमुच ।

द्यानुक नागराद ग्यानुक देंस्ययाव ॥

पॉराव यॅन्दराज़ुन हन हन ॥० ॥

अजर अमर छु पानु भगवान,

वरदान बॅखुत्यन दिवान ग्यानुक ।

सेकि सॅहरावन शेहलावान ताव ॥

पॉराव यॅन्दराज़ुन हन हन ॥० ॥

युस नाव मॅरिथ ति रोज़ान ज़िन्दय,

रिन्दय तस कुलि आलम वनान ।

सुय नाव 'रोशि रोशि' सॅनिराव ॥

पॉराव यॅन्दराज़ुन हन हन ॥० ॥

* * *

साहिबि कमाल

मे कोरमुत पान च़ेय हवालु, हर ज़वालु निशि रछतम ।
बु माँसुम जान गोमुत बेहाल, हर ज़वालु निशि रछतम ॥

स्वतेमुच़ ऱेह सोरेमुच़ त़ेह, दिह शिठरोवमुत जंजालव ।
बु बेगरि हटि दिवान नालु, हर ज़वालु निशि रछतम ॥

बु पनुन्यन मंज़ निनु आमुत, च़ामुत छुस गित्यन बो ।
रोवमुत मंज़ वति मे खतु खालु, हर ज़वालु निशि रछतम ॥

बोराह बाह पल बु दम फुट्य गोमुत, ख्योमुत छुनस वॅम्यतौन्य दौद्य ।
दग बु ज़ख्मन किथु पौठ्य च़ालु, हर ज़वालु निशि रछतम ॥

वुजमलन गगुरायन छुम दरुन, तरुन अपोर छुम ग्यानु सँदुरस ।
कमि आशि च़टख अंदकारुचि ज़ालु, हर ज़वालु निशि रछतम ॥

बु मूखी मूडा स्यठाह नादान, वदान ज़ीनमुतिस तु रौव्यमुतिस छुस
अथु व्यसरिथ फुटुम मस प्यालु, हर ज़वालु निशि रछतम ॥

कमाल चु ति छुख अय साहिबि कमालु, मलालु रटान छुख 'रोशि रोशि' ।
मे त्रावुनावान अँछव अँश्य च़ालु, हर ज़वालु निशि रछतम ॥

* * *

ग्वरु दया

ग्वरु सुंज दयायि कायायि जंग ज़ोल,
फोल मनु मन्दरस लोलु पम्पोश ।
बबु सुंजि कृपायि कायायि दोद बोल ॥
फोल मनु मन्दरस लोलु पम्पोश ॥० ॥

ग्वरु सुंद ग्वरु नाव व्रचि खोरुम,
दोरुम हलम दान दोरिथ ।
सूहमकि व्वचि सोन मे खोन ज़ोल ॥
फोल मनु मन्दरस लोलु पम्पोश ॥० ॥

ग्वरु सुंजि केंहवचि मन सरु करुनोवुम,
नोवुम ॐ देहकुय ब्रांद ।
अमर्यतु ज़लु छ्वकु कोडुम दोल ॥
फोल मनु मन्दरस लोलु पम्पोश ॥० ॥

ग्वरु सुंजि आशि चाशि खोत मेछर,
टेछर चाछर तु च्वक्यूर म्वकल्योम ।
लोलुक म्यूठ प्रसाद मन मे ख्योव फोल फोल ॥
फोल मनु मन्दरस लोलु पम्पोश ॥० ॥

ग्वरु सुंजि खावि गोड द्युतुम लोलु,

वोलु दोलु कर्मस खुर मे द्राव ।

सूर मनकलि हुंद दौन्य दौन्य मे पानस मोल ॥

फोल मनु मन्दरस लोलु पम्पोश ॥० ॥

ग्वरु तीजु अन्दकारस छग लॅज,

गॅज मोह नेन्दुर मे जन्मन हुंज ।

ग्वरु पूजाय अग्यानस ब्योल गोल ॥

फोल मनु मन्दरस लोलु पम्पोश ॥० ॥

ग्वर यस मदुतस तस क्याह गम,

वॅहम तु ब्रम तस गछान दूर ।

पाँचालुक्य काव चलान होल होल ॥

फोल मनु मन्दरस लोलु पम्पोश ॥० ॥

ग्वरु सुंजि करुनायि मे तार लगान बवुसरस,

सॅदरस वूलिस हम खम हमान ।

‘रोशि रोशि’ मोल लोलु करान लॅल्य लॅल्य ॥

फोल मनु मन्दरस लोलु पम्पोश ॥० ॥

* * *

सौबिर तु रहबर

पम्पोशि पादन जुव जान वंदुय, पूजा करय पूजा करय ।
न्यरमल चरनन अशि गोड दिमय, पूजा करय पूजा करय ॥

चु बडि पायि सत ग्वरु थजरस बिहिथ,
छुनिथ फ्यरना दस्तार गॅन्डिथ ।
अथ शीतल अनुहारस लोलाह बरय ॥
पूजा करय पूजा करय ॥० ॥

सूहमसू सौरिथ बन्यव ओमकार,
जय जय कार भगवान् रूपस ।
बुति चानि नावुक मंत्र परय ॥
पूजा करय पूजा करय ॥० ॥

वुठन सूत्य्चिलिमाह चिमटा अथस,
मलंगस च्यथ द्यानस मंज ।
चु प्रथ जरस मंज चरा चरय ॥
पूजा करय पूजा करय ॥० ॥

पादन तल नारु मनकल वुहान,
व्वपदान नाफु अति अनुग्रेहकुय ।

नॉपान चानि ज़ुचु आगरय ॥

पूजा करय पूजा करय ॥०॥

तैतिस मँतिस वावस ठरि चॉन्य ख्राव,

नाव यिहय तारान वूलिस सँदुरस ।

तार लगि मे बवुसरु चानि वरय ॥

पूजा करय पूजा करय ॥०॥

चु अनुहोर सादाह दामानु वँटिथ,

खँटिथ मँटिथ मोह मद चँटिथ ।

चु ज़गुतुक सरदार शूबान थज़ुरय ॥

पूजा करय पूजा करय ॥०॥

बु दौद्य ह्यथ कर्मक्य बेहाल,

ज़ाल नादौरी हुंद्य नालयु ।

रछतम ललुनावतम कडतम शरय ॥

पूजा करय पूजा करय ॥०॥

बब मौज चुय छुख सॉबिर तु रहबर,

अँहर थँहर कासान बँखुत्यून ।

कासतम 'रोशि रोशि' थरु थरय ॥

पूजा करय पूजा करय ॥०॥

* * *

बक्ति वत्सल

भगवानु मोल चुय भगवानु मॉज चुय,
ललुवान चुय रखान चुय ।
मनि मंज मे चोन वास तथ छम चॉन्य द्रुय ॥
ललुवान चुय रखान चुय ॥० ॥

बन्द तय बांदव ज़ागि क़हुन्य काव,
टाव टाव करान वोरान सुबह शाम ।
पनुन्यव तु परद्यव लोगहस दावुसुय ॥
ललुवान चुय रखान चुय ॥० ॥

सम्सारु सँदरु वोंता ऑन्थु रोस,
त्रेय रोस मे कुस तारि सागरस अपेार ।
नावि नम रँटिथुय तारुम बवुसरुसुय ॥
ललुवान चुय रखान चुय ॥० ॥

मूडाह मूखी वुहान अग्यानु नारु,
अहंकार सुत्यन ह्योतमुत जलाव ।
नागराद वुज़नाव मंज़ु सँहरावसुय ॥
ललुवान चुय रखान चुय ॥० ॥

माया छि छाया चलुवन्य तु छालुवन्य,

लोसवन्य जवॉनी जून डलुवन्य ।

चोनुय सु प्रकाश पोशिवुन जहानुसुय ॥

ललुवान चुय रछान चुय ॥० ॥

जंगु जंग छुस करान ज़ीन्य ज़ीन्य होरान,

व्वथरान वोतुम ज़ख्मन खून ।

पावुहॉन राख्युस मनि छुम हावुसुय ॥

ललुवान चुय रछान चुय ॥० ॥

ननुवोर स्वदामा छारान पम्पोशि पाद,

व्याद यिम कासान जन्मन हुंज ।

ललुविथ वछस मंज कमि चिकु चावुसुय ॥

ललुवान चुय रछान चुय ॥० ॥

बब च़ेय वनान बावान दौद्य छिय,

अनुग्रैहसुय प्रारान छिय ।

‘रोशि रोशि’ लगोय ना दौद्य बलुरावनसुय ॥

ललुवान चुय रछान चुय ॥० ॥

* * *

नाद

बबु भगवानस नाद दिमु, नाद दिमु बबु भगवानस ।
सतु ग्वरस लोलु डॉल्या निमु, डॉल्या निमु बबु भगवानस ॥
मनि मंज दिलबर स्वखु बेहनावन, ललुनावन दिलु दुबुराय ।
लोलुक्य सोज लोलु बोजुनावन, करन मदहोश ग्रायि ग्रायि ॥

बबु भगवानस नाद दिमु ॥०॥

कोसि कजुहुक्य सथ रंग मलस, वलस शेरि दस्तार नपुवुन ।
अशिवानि ख्वर छलस, जालस रँत्न दीप जन सिर्यि प्रजलवुन ॥

बबु भगवानस नाद दिमु ॥०॥

श्वजि वासनायि दान दोरिथ, व्यचोरिथ आचारस फकत अख नाव ।
ग्वरु मंत्रुक सार फिकरि तौरिथ, अदु रॉविथ शेहलॉविथ अग्यानुक सँहराव ॥

बबु भगवानस नाद दिमु ॥०॥

जगतुक ग्वर युस जगतुक मोल, लोल सुय बॉगरान बॅखत्यून पनुन्यून ।
बवु सागरस युस तारनवोल, गालनवोल सुय द्वखन तु दाघन ॥

बबु भगवानस नाद दिमु ॥०॥

सर नोमरिथ गछु 'रोशि रोशि', पम्पोश पादन व्वन्दस जुव तु जान ।
लोलुक म्वय च्यथ लोलुकि जोशि, बोशि बबु सुंदि चलि जन्मुच हान ॥

बबु भगवानस नाद दिमु ॥०॥

* * *

आमुत शरन

आमुत शरन प्योमुत परन, पनुन्यन ख्वरन तल रछतम चुय ।
पापन तु शापन छुख हरन, पनुन्यन ख्वरन तल रछतम चुय ॥

खबर क्याज़ि वुह्य तु वाय सनेमुत्य,
बनेमुत्य यिमय म्यौन्य् बंद तु बांदव ।
दिवान बु कावु दार्यन बरन ॥
पनुन्यन ख्वरन तल रछतम चुय ॥० ॥

वसान अँछव अँश्य चालु सुबह शाम,
बेराम मन रोवमुत आराम ।
दोह राथ बु बस अरुसरु करन ॥
पनुन्यन ख्वरन तल रछतम चुय ॥० ॥

यिम ओस्य पनुन्य वनु वौस्य गँयि,
डौस्य गँयि येम्बरज़लन दूरय ।
अनुहौर्य अमार जुव्य जुव्य मरन ॥
पनुन्यन ख्वरन तल रछतम चुय ॥० ॥

मे वरमुच हौन्कल खाबन ख्यालन,

प्यालन मे बोरमुत अलमास ।

मे रोवमुत शुमार कतरन कतरन ॥

पनुन्यन ख्वरन तल रछतम चुय ॥० ॥

सोंचान स्वरान रॉस्य् गॉयि मे रॉच,

बॉचि गरुक्क वनान गोमुत बु फलवा ।

लसु किथु तु बसु व्हंघन गरन ॥

पनुन्यन ख्वरन तल रछतम चुय ॥० ॥

मे चोंगा ज़ाजोव अग्यानु आचारस,

व्यचारस व्यवहारस दिचॉम खँहरन ।

ऑविल्य् शमाह किथु वावस दरन ॥

पनुन्यन ख्वरन तल रछतम चुय ॥० ॥

ऑखुर दुनिया फना फिला,

दुहल्य सोपुनाह यि ज्योन तु मरुन ।

ऑकुल येति बॉगरान बेकुल सोम्बरन ॥

पनुन्यन ख्वरन तल रछतम चुय ॥० ॥

अहंकार्य मलुखव देह म्योन ग्यूरमुत,

तुलमुत हुय छुख 'रोशि रोशय' ।

तार किथु लागि यिय छुस स्वरन ॥

पनुन्यन ख्वरन तल रछतम चुय ॥० ॥

* * *

छ्योनमुत मुर

छर्यो अथव बु गछु क्याह,

निमु क्याह डॉल्य सत ग्वरस ।

चन्दु छोन खरुचावु क्याह,

निमु क्याह डॉल्य सत ग्वरस ॥

ऑलिफस दाल हाल बेहाल,

जंजाल कर्मुक जाल वॅहरिथ ।

खुर्य लद कर्मस परु क्याह,

मंगु क्याह वर सत ग्वरस ॥

आँव्यजि लंग लंजि फुचिमचु, सनेमचु खंजि नैनिस बदनस ।

वदुवन्यन ज़खमन मथु क्याह, ह्यमु क्याह दवा सत् ग्वरस ।।

पॅक्य पॅक्य गोम मंदियन शाम, गाम दूर्योम कुस नियि पॉगाम ।

अन्यन वतन पकु क्याह, वनु क्याह बहानु सत ग्वरस ।।

मे अजब दोद मनि सन्योमुत, बन्योमुत हनि हनि शिवस शव ।

दम फुट्य अमारन दिलासु क्याह, हावु क्याह चॅटिथ सत ग्वरस ।

बु शुर्य ख्यालनुय मंज़ वुनि, वुनि गिन्दान बु अँन्य कतुर्यन ।

गॅनिस जंगलस बु छारु क्याह, खारु क्याह नियाज़ सत ग्वरस ।।

हवुहस अज़ तूफान मत्योमुत, शिठ्योमुत शीन बालु थ्वंग्यन ।

फुटिमुत्यन बानन सारु क्याह, बावु क्याह शेरि सत ग्वरस ।।

अग्यानु सहरावस सैकि शाठस, पाठ परनस न अनुवॉर्य ।

मीचुर्य कंड्यन चारु क्याह, त्रावु क्याह नॉल्य सत् ग्वरस ।।

बु अज़ ति स्वदाम ओश हारान, प्रारान 'रोशि रोशि' बु दिलबरस ।

छैन्यमुतिस मुरिस बु गंडु क्याह, वन्दु क्याह पादन सत ग्वरस ।।

* * *

हलम दारिथ

हालि दिल पनुन बोझुनावनि आमुत,
 चामुत बारगाहि हलम दारिथ ।
 जारु पारु कॅरिथ रंजुनावनि आमुत ॥
 चामुत बारगाहि हलम दारिथ ॥० ॥

प्योमुत परन बु पादन तल,
 हल मुशिकलन छारान ।
 सरनोमुरिथ दौघ् बावुनि आमुत ॥
 चामुत बारगाहि हलम दारिथ ॥० ॥

हजर लद व्यसरिथ बांबुर्योमुत,
 गोमुत लछि तु लतु म्वंजे ।
 अँदुरेमुत्य जख्म हावनि आमुत ॥
 चामुत बारगाहि हलम दारिथ ॥० ॥

ननुवोर न्यथुनोन जूग्य जन फेरान,
 दवान दोरान मोत ह्युव वोरान ।
 कर्मलो न शेरनावुनि आमुत ॥
 चामुत बारगाहि हलम दारिथ ॥० ॥

न वदुनस थक न छ्वपु केरनस वार,

तार तार गोमुत दिले बेमार ।

दाद्यन दवा छारुनि आमुत ।।

चामुत बारगाहि हलम दोरिथ ।।० ।।

नशतर ह्यथ वछस प्यठ दैर्ययोदन,

तन मन ओव्युल त्रैहर्योमुत ।

पनुन पान प्रजुनावनि आमुत ।।

चामुत बारगाहि हलम दोरिथ ।।० ।।

रफतार स्वत्योमुत गुफतार कल्योमुत,

आमुत हरुद सोतु सोतय ।

‘रोशि रोशि’ अनुग्रेह सोम्बरावुनि आमुत ।।

चामुत बारगाहि हलम दोरिथ ।।० ।।

* * *

दिलुक्य मुराद

बु दारु ना हलम चानि बडि दरबारु,
 वारु वारु दिलुक्य मुराद गछुनम पूर ।
 बु छारु ना चॉन्य पाद युथ बन्यम चारु ॥
 वारु वारु दिलुक्य मुराद गछुनम पूर ॥० ॥

तीजु सोस ड्यकु चोन सासु सिर्यि प्रकाश,
 गाश ह्यथ आश चॉन्य कासान जूनि गोन ।
 बु प्रारु ना दोह राथ चानि अमारु ॥
 वारु वारु दिलुक्य मुराद गछुनम पूर ॥० ॥

प्रचंड बारगाहि हुंद जगतस मशहूर,
 दूर दूर गाह प्यवान सुबहन तु शामन ।
 बु सारु ना लोलु पोश जगुतुकि सरदारु ॥
 वारु वारु दिलुक्य मुराद गछुनम पूर ॥० ॥

यॉरी छि गछान खॉरी म्वकलान,
 बलान बॅखुत्यन दॉद्य नॅव्य तु प्रॉनी ।
 बु लारु ना ननुवोर चानि दीदारु ॥
 वारु वारु दिलुक्य मुराद गछुनम पूर ॥० ॥

पद्यन राह छुम वसम आनि बाह,

शाह छ्वक्योमुत त्वकुचारसुय ।

बु हारु ना अँछव खून चानि दारु ॥

वारु वारु दिलुक्य मुराद गछुनम पूर ॥०॥

कँरिथ श्रानाह द्यानुक ग्यानुक चोंग ज़ालु,

गालु गांगल मनस छँच तु रंगदार ।

बु कारु ना मन तु प्रान चानि लोलु नारु ॥

वारु वारु दिलुक्य मुराद गछुनम पूर ॥०॥

सफराह ज्यूठ कँडिथ प्योमुत थँकिथ छेनिथ,

कुनिथ गुनु अर्मानन हुंज बु अथु छोनये ।

बु पारु ना पान पनुन चानि इशारु ॥

वारु वारु दिलुक्य मुराद गछुनम पूर ॥०॥

मे अभिलाश बस अकुय बेहमु पादन तल,

शुहुल तु शीतल चमु लोलु गोला ।

बु खारु ना खुमार अनुग्रेहकि शैहजारु ॥

वारु वारु दिलुक्य मुराद गछुनम पूर ॥०॥

मॉर्यफतकि रसु मदहोश कोरुम रसु रसु,

वसु 'रोशि रोशि' अथ सँनिस सँदरस ।

बु चारु ना जामि जम लोलु आबशारु ॥

वारु वारु दिलुक्य मुराद गछुनम पूर ॥०॥

जलवृगर

देह शमशानुक ज़न पौहु गटुकार, अन्दकार अमारन करान मिसमार।
कूठ बाल वूल सीनस प्यठ बार, लार मोतुन्य च़टान शाह रगि तार ॥

शुक्रानु पेश क्या करु तथ जलालस,
तस साहिबि कमालस निमु क्याह डॉल्य्।
मन्दछान आफताब ब्रोंह कनि जमालस ॥
तस साहिबि कमालस निमु क्याह डॉल्य् ॥० ॥

सफरस नीरिथ बोम वति कूठ प्योम,
चोम सँहराव मंज़ु तोत सीमाब।
अमर्यथ येम्य् बनोव ज़हरकिस प्यालस ॥
तस साहिबि कमालस निमु क्याह डॉल्य् ॥० ॥

ज़हरि अलमासुच दग ललुनॉवुम,
रॉवुम राथ अँछिनुय मंज़।
युस दिलबर वुछनि आव बेहालस ॥
तस साहिबि कमालस निमु क्याह डॉल्य् ॥० ॥

येमु रात्र येमु वुछुम थफ दिवान अमीनन,

प्रानन दर दिवान ओस बे आर ।

येम्य अकि इशारु छ्यन द्युत कालु बयि ज़ालस ॥

तस साहिबि कमालस निमु क्याह डॉल्य ॥० ॥

दुह शमशानुक ज़न सीनन चोमुत,

गोमुत रगन श्रुक तु ह्युक लोगमुत ।

येम्य दीन दयालन खुर कोड कपालस ॥

तस साहिबि कमालस निमु क्याह डॉल्य ॥० ॥

छॅर्य अथु छॅन्यमुत्य तु वॅलिथ ज़वालस,

नालस चाख ज़्यूठ चन्दु छोनुये ।

येम्य रुति वेलु अनुग्रेह बोरनम थालस ॥

तस साहिबि कमालस निमु क्याह डॉल्य ॥० ॥

जुव जान वन्दुहॉस पम्पोशि पादन,

नादन 'रोशि रोशि' युस थवान गोश ।

लगुना पॉर्य नूरि हिलालस ॥

तस साहिबि कमालस निमु क्याह डॉल्य ॥० ॥

* * *

ओमकार

भगवान् दारस थम ओमकारुक्य,
 नव बहारुक्य फोल्यमुत्य पम्पोश ।
 बबु सुंजि बारगाहि पोश स्वर्ग दारुक्य ॥
 नव बहारुक्य फोल्यमुत्य पम्पोश ॥० ॥

ओमुय ड्यकस ओमुय वथ हावनस,
 चावनस तु ख्यावनस ओमकुय जाम ।
 सोंबरिथ कतरु कतरु अमर्यतु आबशारुक्य ॥
 नव बहारुक्य फोल्यमुत्य पम्पोश ॥० ॥

देंछिन खोवुर्य सिर्यि ज़ोतान,
 प्रज़लान म्वखस नूरुय नूर ।
 ड्यकस नॉपान रंग गुलज़ारुक्य ॥
 नव बहारुक्य फोल्यमुत्य पम्पोश ॥० ॥

मुश्किल करुन्य छि ग्रन्द ग्वनन,
 कथन माने कडुन द्वर्लभ ।
 नपुवनि तीज़ तु शीलु स्वबावुक्य ॥
 नव बहारुक्य फोल्यमुत्य पम्पोश ॥० ॥

गोव रावु रावुन दोह तय राथ ।

न्यरमल आचारुक्य तु मोदुरि व्यचारुक्य ॥

नव बहारुक्य फोल्यामुत्य पम्पोश ॥० ॥

सूहमुक व्वमन होर ग्यानु मनकलि,

फलि फलि हुमान हम तय खम ।

हतु बँद्य सासु बँद्य द्यान साहूकारुक्य ॥

नव बहारुक्य फोल्यामुत्य पम्पोश ॥० ॥

खसहा 'रोशि रोशि' सतन फलकन,

वुछहॉन सनुम्वख बबु भगवान ।

बोज़ हा शंखु नाद जय जय कारुक्य ॥

नव बहारुक्य फोल्यामुत्य पम्पोश ॥० ॥

* * *

प्यालु अज गनोमथ

बर मुचराव अज खजानन असि कुन,
वरजुन वाव म्वकलि नोव तु प्रोनय ।
हलम दोरिथ अँस्य वुछान च़ेय कुन ॥
वरजुन वाव म्वकलि नोव तु प्रोनय ॥० ॥

ननुवोरय न्यथु नँन्य तु चन्दुछेन्य,
अँन्य हिब्य् सौरय सौरय पकान ।
प्रव प्रज़लित गाश हाव नपुवुन ॥
वरजुन वाव म्वकलि नोव तु प्रोनय ॥० ॥

दीन मोहताज अथु दारान,
हारान अशि कनि अँछव खून ।
ओश मे व्वथुराव तुरुन तय वुशुन ॥
वरजुन वाव म्वकलि नोव तु प्रोनय ॥० ॥

गोन जंगुला बैरिथ सर्फव ।

अकि इशारु राम करुन शाहमार क्रुहुन ।।

वरजुन वाव म्वकलि नोव तु प्रोनुय ।।० ।।

चानि अनुग्रेह सरशारु गछि पयमानु,

मयखानु बाँगरावि लोलुक्क्य जाम ।

प्यालु अज गनीमथ छु चोन तु चावुन ।।

वरजुन वाव म्वकलि नोव तु प्रोनुय ।।० ।।

बर तल वदान वदान अँस्य् आमुत्य,

चामुत्य गित्यून अँस्य लाचार ।

चानि यछायि जूनि जलि गुहुन ।।

वरजुन वाव म्वकलि नोव तु प्रोनुय ।।० ।।

बुति प्रन वँरिथ ती बिहिथ छुसय,

लय गँछिथ नावस चॉनिस ।

‘रोशि रोशि’ मे चोन नाव ल्वलि ललुवुन ।।

वरजुन वाव म्वकलि नोव तु प्रोनुय ।।० ।।

* * *

कासि हे खोरी

प्रारान बबस अँस्य हलम दोर्य दौरी,
 यियि कर यपौरी तु करि अनुग्रेह ।
 दारि बँर्य दिवान नज़रु कर दियि अनुवौरी ॥
 यियि कर यपौरी तु करि अनुग्रेह ॥० ॥

छेनिमुत्य रुनेमुत्य दामानु वँहरिथ,
 थँकिथ हॉरिथ पथुर पेमुत्य ।
 अँछव खून दारि हनेमुत्य टौरी ॥
 यियि कर यपौरी तु करि अनुग्रेह ॥० ॥

चँटिथ छंडिथ खुर्य लद वतन,
 हतन शतन रॉवमुन्न ग्रंद ।
 यियि ह्यस आर बोज़िय विलुज़ौरी ॥
 यियि कर यपौरी तु करि अनुग्रेह ॥० ॥

फौरिथ होल कोल क्रमु लोन ह्यथ,
 व्यथ सँहलाबुच दिवान दोल ।
 डालिह्यस अथु पनुन तु चलि नादौरी ॥
 यियि कर यपौरी तु करि अनुग्रेह ॥० ॥

अँचिथ अन्दर बोव हालि दिल ।

मगर बेमार दिलस तोति बेकरॉरी ॥

यियि कर यपॉरी तु करि अनुग्रेह ॥० ॥

पँरिथ लीखिथ होखिथ अँदुरॉविथ,

नहनाँविथ रॉव अछर ज्ञान ।

ग्यानुक वरदान मंगान अँस्य् सॉरी ॥

यियि कर यपॉरी तु करि अनुग्रेह ॥० ॥

अनि गटु कूठुर यि ज़न्म सोन,

ज़ूनि ग्रोन लोगमुत हॉर्य हृदय ।

येछिहे तु 'रोशि रोशि' कासिहे खॉरी ॥

यियि कर यपॉरी तु करि अनुग्रेह ॥० ॥

* * *

जगतुक ग्वर

यस डेकि क्वंगु ट्योक गाह त्रावान,

सुय ग्वर सोन बबु भगवान ।

तनि फ्यरन शेरि दस्तार शूबान ॥

सुय ग्वर सोन बबु भगवान ॥० ॥

चरनन प्यमस ना पूजा करस ना,

छलस ना बु पाद अशिवाने ।

यस ख्वरन खाव ज़न पम्पोश शोलान ॥

सुय ग्वर सोन बबु भगवान ॥० ॥

वन्दोस ना जुव जान थज़ि बारगाहि,

दयायि यसंजि बनान अनुग्रेह ।

यस म्वखस सिर्यि चेंद्रम प्रज़लान ॥

सुय ग्वर सोन बबु भगवान ॥० ॥

बडि ख्वतु बोड दरबार येम्यसुंद,

येम्यसुंद नाव मंत्र रुचरुक ।

यस ब्रोंह कनि नारु मनकल वुहान ॥

सुय ग्वर सोन बबु भगवान ॥० ॥

बैखृत्यन हुंज कल यस सुबह शामय ।

यस अथस चिलमा हॉर्य हरदु ज़ोतान ॥

सुय ग्वर सोन बबु भगवान ॥० ॥

औरजुव तु दौरकोठ बस मंगान,

करान सु दाघन दवा ।

यस अंग अंग नूरि नूरान ॥

सुय ग्वर सोन बबु भगवान ॥० ॥

यस सन्यर लोलुक गन्यर ग्यानुक,

द्यानुक मंत्र ओम नमः शिवाय ।

यस तीज नॉपान श्वंगरफ पशपान ॥

सुय ग्वर सोन बबु भगवान ॥० ॥

बैयि छा कांह युथ ग्वर ज़गतुक,

सबरुक समन्दर येम्य छुनमुत च्यथ ।

यस प्रचन्द्र 'रोशि रोशि' चमकान ॥

सुय ग्वर सोन बबु भगवान ॥० ॥

* * *

गिरदाब

वोंत अति रोवमुत कूला सोन, गोन जंगुला कुहुन तु कट काल ।
 यि सँदुर कर्मक लोरि रोस ओन, नोन अति फकत कालुन ज़ाल ॥

कठिनेय सँदुरय तार दितु बवसरु,
 थरु थरु कासतम पनुने वरय ।
 सनि समन्दरय छुस करान अरुसरु ॥
 थरु थरु कासतम पनुने वरय ॥०॥

हतु बँद्य जँद्य गँमुत्य् नावि म्यानि,
 लानि लीखिथ छिम परुगॉल्य् ।
 शाठस मै प्रान मलखन हुंज दुर दुर ॥
 थरु थरु कासतम पनुने वरय ॥०॥

चोटमुत गिरदाबव हमतुल म्वच्योमुत,
 रोवमुत कतितान्य यीरु गोमुत ।
 आवुलुनिस अँनिस लोगमुत मै मरु मरु ॥
 थरु थरु कासतम पनुने वरय ॥०॥

खबर क्याज़ि न्यरमल ज़ल अज़ टेठ्योमुत,
 मिलनोवमुत कँम्य अमर्यतस तेज़ाब ।

थरु थरु कासतम पनुने वरय ॥०॥

छेनिथ थॅकिथ यि दोह लूसुम,

ओसुम वुछुन मन्दुन्यन शाम ।

गगुरायन वुजुमलन अपोर किथु तरु ॥

थरु थरु कासतम पनुने वरय ॥०॥

बु हॉन्ज़ बेकल प्रारान स्यमंज़स,

बिहिथ नावि नमस वुछान फलकन ।

बु हारान अँछव खून गछान छुय नु ज़रु ज़रु ॥

थरु थरु कासतम पनुने वरय ॥०॥

त्रॅहरयोमुत मंज़ डलस दम फुट्य बु गोमुत,

रोटमुत क्व पॉठ्य शापु व्वदरव ।

नीलेमुच र्वपु तन मरुनुय फकत परु ॥

थरु थरु कासतम पनुने वरय ॥०॥

वोल्योमुत सॅदुर श्रोपरावुन खास्यन,

छ्यन युथ लगि सॅहलाबस ।

‘रोशि रोशि’ फकत मै चोनुय आसरु ॥

थरु थरु कासतम पनुने वरय ॥०॥

* * *

पँज लीला

दीदव दीदार गोम, दिल तंबल्योम दिल तंबल्योम ।
ग्वरु कृपायि हलम दार्योम, दिल तंबल्योम दिल तंबल्योम ॥

संगरमालन श्रोचि छोरुम, खोरुम डलु न्यरमल पम्पोश ।
वँथरु वँथरु तस पादन लाजोम, दिल तंबल्योम दिल तंबल्योम ॥

व्रत दँरिम ज़प कँरिम, पँरिम मंत्रु सासु बँछी ।
टासरिस सोन सोन खन्योम, दिल तंबल्योम दिल तंबल्योम ॥

अज़ ब्रु दिल फुटिथ यतन कँरिथ, थँकिथ हॉरिथ दरबारस मंज़ ।
अँन्दर्युम दोद वनुन प्योम, दिल तंबल्योम दिल तंबल्योम ॥

शेरि सफेद जामु गँन्डिथ, लॉंगिथ फ्यरन तनि वुछुम ।
बब भगवान सनु म्वख बास्योम, दिल तंबल्योम दिल तंबल्योम ॥

थरु थरु वँछुम ओश ददरायि, दिलु दुबराय गँयेम तेज़ ।
थॉन्थर्योस बांबर्योस ह्यसु व्यसुर्योम, दिल तंबल्योम दिल तंबल्योम ॥

यि पेंज छा लीलापिनु सोपुन प्रखट्योम, दिल तंबल्योम दिल तंबल्योम ।

कृति कालुक सोपुन प्रखट्योम, दिल तंबल्योम दिल तंबल्योम ।।

यि प्रजलवुन अनुग्रेह 'रोशि रोशि वोदुम, रोदुम काचि यि बेकुल मन ।

यिय नन्योम ती ल्वलि ललुव्योम, दिल तंबल्योम दिल तंबल्योम ।।

* * *

तुरु पचि

छॅर्य अथु मे चन्दु खॉल्य, स्वाँल्य बु आमुत बर तल ।

छैन्यमुत्य प्रानुवार तु जन्दु नॉल्य, सवाँल्य बु आमुत बर तल ।।

यिमेन दिहक्यन पलवन तु दलवन, ललुवन बु चाख सॅन्य तु गॅन्य ।

मे र्वपु तनि गॉमुत्य परगॉल्य, सवाँल्य बु आमुत बर तल ।।

बूजमुत मे छुख सखा, दाद्यन दवा दिवान छुख चुय ।

दॉद्य ह्यथ फेरान बॉल्य बॉल्य, सवाँल्य बु आमुत बर तल ।।

सँदर बुधि बु बिहिथ बठि, नठि छिम प्रान तरु किथु अपोर ।

वोलेमुत्यव मलखव लॉजमुन्न दमॉल्य, सवॉल्य बु आमुत बर तल ।।

मे नाल वोलमुत खुर्य लद जालव, जंजालव कोरमुत गीर ।

मोत ह्युव फेरान गोमुत वुबॉल्य, सवॉल्य बु आमुत बर तल ।।

वोटुम गरदि गुबार शरतलि, सरतलि स्वनु ब्रॉन्न् खाम तमा ।

नादॉरी हुंघ अया तुतुवॉल्य, सवॉल्य बु आमुत बर तल ।।

रुनेमुत्यन जचन दजि त्रोप, चोप ऑविलिस रतु दॉव्य ।

ल्वति पॉठ्य मे वुह्य तु वाह चॉल्य, सवॉल्य बु आमुत बर तल ।।

सोंतु सोंतय हरुद लोगमुत, जंजुर्योमुत 'रोशि रोशि' पम्पोश ।

मन्दुछोमुत बु निमु क्याह ग्वरस डॉल्य, सवॉल्य बु आमुत बर तल ।।

* * *

प्रारुन छु रवा निवुस सुबहस, सुबहस सुबहस,

शिहिलिस शुहुल वातनावुन शोहजार ।

छारुन छु रवा प्रागाश सुबहस, सुबहस सुबहस ॥

शिलस शुहुल वातनावुन शोहजार ॥०॥

अनि गटु रोज़ि कैह दमा रातस,

मुलाकातस छुन व्वन्य चेर ।

यारुन छु रवा यार सुबहस, सुबहस सुबहस ॥

शिलस शुहुल वातनावुन शोहजार ॥०॥

संगरमालन म्वख्तु वुज़ि शीतल,

न्यरमल फ्वलि डलस पम्पोश ।

व्यचारुन छु रवा सत् ग्वरस सुबहस, सुबहस सुबहस ॥

शिलस शुहुल वातनावुन शोहजार ॥०॥

सूहमचि तारि नोव साज़ नेरि,

वेरि तसंज़ि गछुन मदहोश ।

दारुन छु रवा हलम सुबहस, सुबहस सुबहस ॥

शिलस शुहुल वातनावुन शोहजार ॥०॥

वोंत ह्योन सनिरस तु गानिरसुय,

ननिरसुय तसुंदिस ल्वलमतुलाय ।

व्यतरुन छु रवा लोल सुबहस, सुबहस सुबहस ॥

शिलस शुहुल वातनावुन शोहजार ॥० ॥

लोल तसुंद अनमोल ज़ानुन,

मानुन लोलुय पानु भगवान ।

प्यतरुन छु रवा यि दौद सुबहस, सुबहस सुबहस ॥

शिलस शुहुल वातनावुन शोहजार ॥० ॥

पांछ कोरव अँछन थोप दिथ,

थफ दिथ करान नंगु अमीन ।

मारुन छु रवा धरयोधन सुबहस, सुबहस सुबहस ॥

शिलस शुहुल वातनावुन शोहजार ॥० ॥

दोह छि कम मगर वॉन्सा बाकुय,

साकुय प्रारान जामि मॉर्यफत ह्यथ ।

सोंबरुन छु रवा अमर्यथ सुबहस, सुबहस सुबहस ॥

शिलस शुहुल वातनावुन शोहजार ॥० ॥

लोलु हत्यून करान येति तति मंज़ूर,

सोरूर अनान छुख 'रोशि रोशि' ।

वहरुन छु रवा दामानु सुबहस, सुबहस सुबहस ॥

शिलस शुहुल वातनावुन शोहजार ॥० ॥

* * *

सतच वथ

ग्वरु ग्वरु कॅर्य कॅर्य फ्यूरुस जहानस,
 ग्वर वुछुम बिहिथ मंज आयिसतासन ।
 ग्वरु नावु छिम फवलान गुल पानस ॥
 ग्यानु मुश्का फेरान प्रथ तानस ॥०

सतची वथ रोज़ हावान सत ग्वरो,
 चोनुय द्यान रोज़ दारान न्यरमलो ।
 मनची गांगल कासतम सत् ग्वरो ॥
 चोनुय द्यान रोज़ दारान न्यरमलो ॥० ॥

ओमकिस छेतुरस सूहम जॅरिथ,
 वॅहरिथ ग्यानु तख्तस द्यानुक मखमल ।
 ज़रस ज़रस मंज नूरि नूरान सतग्वरो ॥
 चोनुय द्यान रोज़ दारान न्यरमलो ॥० ॥

ग्वरु दरबारस मज दीवी तु दीवता,

गाह थज़रय त्रावान थज़रस ।

अर्शु प्यठु फर्शस प्रज़लान सत ग्वरो ॥

चोनुय द्धान रोज़ु दारान न्यरमलो ॥०॥

ग्वरु मयखानस नागु बल शुहुल,

रँस्युल अमर्यथ वुज़ान दोह राथ ।

खावि तल पम्पोश ग्रायि मारान सत् ग्वरो ॥

चोनुय द्धान रोज़ु दारान न्यरमलो ॥०॥

कल छम चॉनी सुबहन तु शामन,

छम मनि कामन च़ेय स्रुत्य् गछु लय ।

नाद म्यॉन्य् बोज़ तु गोश थव सत ग्वरो ॥

चोनुय द्धान रोज़ु दारान न्यरमलो ॥०॥

बु छलुना ख्वर च़ेय अशिवानि,

अग्यानु मानि गछ्यम पाश पाश ।

मोह मदुक नार शौहलावतम सत् ग्वरो ॥

चोनुय द्धान रोज़ु दारान न्यरमलो ॥०॥

प्योमुत परन बु पादन तल ।

बॅखुत्य्न च़ु रछान तु ललुवान सत् ग्वरो ।।

चोनुय द्धान रोज़ु दारान न्यरमलो ।।० ।।

मे सथ छम चॉनी पछ छम चॉनी,

वॉनी मोदुर तु मीठ दितम ।

युथ बु 'रोशि रोशि' चोन नाव परान रोज़ु सत ग्वरो ।।

चोनुय द्धान रोज़ु दारान न्यरमलो ।।० ।।

* * *

रहमतुक चुमट

अथस क्यथ चुमटा ज़न त्रशूल, शूल हरता बखृत्यन हुंद ।
यि गालान अग्यानस मूल, बेयि वूल अहंकार बेकलन हुंद ॥

मनकलि मंज़ यि त्योंगुल चारान, लरि लरि फिरान चिमट सुत्य ।
क्रेहन्यार कर्मन हुंद ज़ालान, प्रज़ुलावान टाठ्यन प्रकाश सुत्य ॥

कैचन टासा रहमतुक, कैचन बासा ओमकारुक ।
कैचन लासा म्वलुल्य खज़ानुक, कैचन सासा ग्यानु प्रकाशुक ॥

कथन द्वन त्रन मंज़ ग्वरु व्वपदेश, त्रेश चावान मॉर्यफतुच ।
वतु हावुक पकान पेश पेश, खेश वहराँविथ अनुग्रेहुच ॥

डेकि चेंद्रम शिवनाथस, गोपी नाथस तीज़ माथस ।
जटि गंगा त्रज़गत नाथस, गोपी नाथस बारगाह चिमटस ॥
शेरि दस्तार बबु भगवानस, र्वपु पानस फ्यरना ज्यूठ ।
मनकल वुहान 'रोशि रोशि' रेश्य वानस, बॉगरोनस लुबि लुबाब म्यूठ ॥

* * *

मौर्यफतुक म्वय

गछुन मदहोश चानि म्वयखानु,
पयमानु लोलुक थाव बैर्य बैर्य ।
गछुन बेहोश मौर्यफतकि वानु ।।
पयमानु लोलुक थाव बैर्य बैर्य ।।० ।।

पींचव रचव खसि क्याह खुमार,
शुमार रिन्दु मस्तानन मंज म्योन ।
चोन नट्यव नार्यव मे अनुग्रेह बानु ।।
पयमानु लोलुक थाव बैर्य बैर्य ।।० ।।

पम्पोशु पादन हुंद अमर्यथ ज़ल,
शुहुल तु शीतल न्यरमल न्यरमल ।
कतरु कतरु सोंबरावु म्वलुल खज़ानु ।।
पयमानु लोलुक थाव बैर्य बैर्य ।।० ।।

शोलुवनि मनकलि हुंद सूर,
दूर करान दिहिक्य दौद्य ।

करे पूरे अमीन राटिथ रवाने दामानु ।।

पयमानु लोलुक थाव बैर्य बैर्य ।।० ।।

चेय रूबरू मे चोन लुबि लुबाब,

शादाब करुन यि ज़जुर ज़न्म ।

मे चानि दरबारुक बनून देवानु ।।

पयमानु लोलुक थाव बैर्य बैर्य ।।० ।।

चानि बरतल मे बेहनुक तमाह,

शमा बैनिथ दज़ून मंज़ूर ।

मन प्रान ग्वरु नावस नज़रानु ।।

पयमानु लोलुक थाव बैर्य बैर्य ।।० ।।

ज़न्म ज़न्मव बु त्रेशि होत,

ब्वछि होत बु लोलु दादे ।

ब्वछि कास मे 'रोशि रोशि' ग्यानु द्यानु ।।

पयमानु लोलुक थाव बैर्य बैर्य ।।० ।।

* * *

चौन्य पाद

चौन्य पाद हृदयस मंज छिम,

रुचुरुक शुहुल शोहजार दिम ।

बख्शान चु पाप यिमन कम छि तिम ॥

रुचुरुक शुहुल शोहजार दिम ॥० ॥

चैय रोस मनि मन्दरस मंज छु कुस,

युस दिलु दुबुरायन मंज बिहिथ ।

तैलि किथ्य वॅहम तंबलान छिम ॥

रुचुरुक शुहुल शोहजार दिम ॥० ॥

शिहलिस शिलस अख नाव ग्रजान,

परान बु ती यि रुम छिम स्वरान ।

यिम कॅम्य ब्रॉन्त्य् वरगुलावान छिम ॥

रुचुरुक शुहुल शोहजार दिम ॥० ॥

कोरमुत मे मोम आहुनुक पान,

अग्यान व्यगुल्योमुत कॅरिथ चोन दान ।

विज़ि विज़ि नाद चान्य गछान छिम ॥

रुचुरुक शुहुल शोहजार दिम ॥० ॥

दज़ुवनिस शमहस सुत्य कॅरमुत्र मे ज्ञान,

फान गछुन पोंपुर ह्युव म्योन अमीन ।

वावुक्य मलख खोचुनावान छिम ॥

रुचुरुक शुहुल शोहजार दिम ॥० ॥

चानि सुमरनि हुंज सुबह शाम कल,

गांगलु सारेय रचिमचु काचि तल ।

लूब ख्यूब फीर्य फीर्य मॅचुरावान छिम ॥

रुचुरुक शुहुल शोहजार दितम ॥० ॥

लोलुके नागरादुक वसुवन आबशार,

बहार युस अनान सॅहरावन ।

‘रोशि रोशि’ साज़ बोज़ुनावान छिम ॥

रुचुरुक शुहुल शोहजार दिम ॥० ॥

* * *

नावि तार

व्वथ सॉ बाया तुल हमतुल, तारस तरुन छुय सॅदरस अपोर ।
नम थाव स्योद तय चिरु रठ हमतुल, तारस तरुन छुय सॅदरस अपोर ।।
पतु गछि चेर डलि सुबहुक शुहुल, तारस तरुन छुय सॅदरस अपोर ।
गुमु श्रानन ओदुर गछि दुहुल, तारस तरुन छुय सॅदरस अपोर ।।

यथ नावि नमुसुय प्यठ छुस लमान, ताराह मंगान बबस ताराह मंगान ।
हमतुल खुर ह्यथ वथ छारान, ताराह मंगान बबस ताराह मंगान ।।

आबस ग्यूर वोथमुत चवापॉरी, दॉर्य दॉरी दिवान मलखन,
आवलुनुय आवलुन हुपॉर्य यपॉर्य, दॉर्य दॉरी दिवान मलखन ।
वोल्येमुतिस सॅदरस छुस वुछान, ताराह मंगान बबस ताराह मंगान ।।

वावु ओन सॅदुर सोन सोन, गोन ओबर खोतमुत अस्मॉन्य,
अॅन्य छटि कोरनस बो न्यथु नोन, गोन ओबर खोतमुत अस्मॉन्य ।
वुजमलन गगुरायन मंज छुस पकान, ताराह मंगान बबस ताराह मंगान ।।

बरमन्दयन गॅयि अनि गटु, छटु छठ करान हॉन्ज बिचोर,
दोहली आकॉश्य वछु त्रटु, छटु छठ करान हॉन्ज बिचोर ।

खूच्च्य खूच्च्य मीतिस डलस तरान, ताराह मंगान बबस ताराह मंगान ।।

कैर्यथुय समुता लैमितव नावे, रावे क्याज़ि काहन गाव,

पछ युस बबस करि सुय बोठ प्रावे, रावे क्याज़ि काहन गाव ।

बब सुंद नाव ह्यथ गुतन छुस छटान, ताराह मंगान बबस ताराह मंगान ।।

यीतनय आर थफ करतम, तारतम यथ सँदरस अपोर,

पाफ शफ सॉरी हरतम, तारतम यथ सँदरस अपोर ।

चानि बारगाहि हलम दारान, ताराह मंगान बबस ताराह मंगान ।।

अपारि सँदरस राजु होंज़ प्रारान, चारान 'रोशि रोशि' म्वख्तु सफेद,

पम्पोशि पादन कित्य् पम्पोश छारान, चारान 'रोशि रोशि' म्वख्तु सफेद ।

दामानु वँहरिथ बैयि हलम दारान, ताराह मंगान बबस ताराह मंगान ।।

* * *

नौली नाल

पगहुचि आशि होल गॅन्डिथ कालय,

जलालय तसुंदि लबु नोव राश ।

ग्वरु सुंदि अमारु बु मारान छालय ॥

जलालय तसुंदि लबु नोव राश ॥०॥

संगरमालन बु व्यूगाह त्रावु,

वहरावु कोसिकज़ा आंगनस ।

आगरुक आबशार वुज़ि तिहुंदि कमालय ॥

जलालय तसुंदि लबु नोव राश ॥०॥

फवलवुनिस गाशस प्रागाशस प्रारान,

छारान गटु पॅछ्य प्रज़ुलवुन्य जून ।

स्वनु सुंद आफताब खसि पॅत्यबालय ॥

जलालय तसुंदि लबु नोव राश ॥०॥

द्वबि द्राव पलवन र्वपु मायि कोरमुत,

रोंगमुत पान मे लोलु रंगय ।

चॅटमुच तु ज़ॉजमुच मे शिकसुनि ज़ालय ॥

जलालय तसुंदि लबु नोव राश ॥०॥

कुम्युर तु कोस्तुर गेवि म्यूठ साज़ा,

राज़ा बेहे मनि मन्दरस मंज़ ।

मुदय गॅन्डिथ वुछस खतु खालय ॥

जलालय तसुंदि लबु नोव राश ॥०॥

अछि पोश पम्पोश वरस द्वन पादन,

नागरादन हुंद बावस अमर्यथ ।

छावु लोल बिहिथ नॉली नालय ॥

जलालय तसुंदि लबु नोव राश ॥०॥

नादॉरी चलि तिहुंदि अकि इशारय,

लय गॅछिथ म्वय च्यथ मॉर्यफ्तुक ।

‘रोशि रोशि’ निहाल कर्यम पनुनि जमालय ॥

जलालय तसुंदि लबु नोव राश ॥०॥

* * *

कौमिल दवा

बबु सुंघन ख्वरन तल मनकलि ब्रोंह कनि,

हनि हनि मथु सूर बदनस ।

नव्यून प्रान्यून दाघन दवा बनि ॥

हनि हनि मथु सूर बदनस ॥० ॥

हकीमन, तबीबन, पीरन, फकीरन,

मन्दरन, मॅशीदन, अस्तानन फ्यूरुस ।

कूचि फिरि वथ रॉव्यम कुनी ज़नि ॥

हनि हनि मथु सूर बदनस ॥० ॥

ऑठुम दर्यम बैयि कॉश्य तु बॉश्य,

राश्य हुंघ दूश्य खोश्य खोहवर्य ।

ज़ातुकस हजि रुखु ननि तु सनि ॥

हनि हनि मथु सूर बदनस ॥० ॥

मे रुम वदान तन मन अँदुरेमुच,

तंबलेमुच थॉन्थरेमुच व्यसरेमुच ।

मे शिलस वुहान नार अयांलेंहा तनि ।

हनि हनि मथु सूर बदनस ॥०॥

ज़ागि रूज़िथ पतु पतु कथु कुतौल्य,

तुतुवौल्य कॅर्यहम पामु दी दी ।

तनि सॅन्य आख तु परुगौल्य मनि ॥

हनि हनि मथु सूर बदनस ॥०॥

रू-ब-रू मूरुच वुछस थलि थलि,

बलि मे दोद पछे छम तीच ।

चानि नावुक अनुग्रेह जगतस ननि ॥

हनि हनि मथु सूर बदनस ॥०॥

बु चानि दरबारु ख्वरु ननु वौरुय,

चौरुय फ्यौरुय दिवान अशु ग्वड ।

‘रोशि रोशि’ युथ मे नाव चोन गनि ॥

हनि हनि मथु सूर बदनस ॥०॥

* * *

बारगाह

थजि बारगाहे आयि वारि वारे,

सनि सेंदुरय बब पानु असि तारे ।

मोह अनि गटि सु अवतार दारे ॥

सनि सेंदुरय बब पानु असि तारे ॥०॥

मायायि सेंदरस नपुवन्य पम्पोश,

होश रावुरावान सेधन तु सादन ।

तमुहकि व्वलरु थफ कॅरिथ खारे ॥

सनि सेंदुरय बब पानु असि तारे ॥०॥

गुथा वूल अॅनिस डलस,

छलस रटान लूबक्य व्वदर ।

मूड मूर्खी छायेन पतु लारे ॥

सनि सेंदुरय बब पानु असि तारे ॥०॥

हमुतुल फुटिथ अथ फुचिमुचि नावे,

किथु परुखावे सनिरस वोंत ।

पॉनिस आवुलुन तु आकॉश्य गगुराये ॥

सनि सेंदुरय बब पानु असि तारे ॥०॥

दव दव तु दोरु दोर प्रथ कोन्सि लँजमुच्च,

गँजमुच्च नेन्द्र तु रोवमुत करार ।

प्रॉट्य प्रॉट्य चन्दन ज़ीन्य ज़ीन्य हारे ॥

सनि सँदुरय बब पानु असि तारे ॥० ॥

थँकिथ छेनिथ चानि बारगाहे,

चानि माये आयि च़ेय शरन ।

हच्चर लदस ओश वसान ददुराये ॥

सनि सँदुरय बब पानु असि तारे ॥० ॥

राज़ु होंज़ु खेलि मंज़ु छ्यनु गोमुत,

गोमुत फलवा गँछिथ परुछ्योन ।

‘रोशि रोशि’ यि बठि पनुन्यन छारे ॥

सनि सँदुरय बब पानु असि तारे ॥० ॥

* * *

मनि छुम हावनस

बबु सुंजि खावे पान वथुरावस,

पादन वहरावस लोलुक्य पम्पोश ।

नागराद वुज्यम सैकि सँहरावस ॥

पादन वहरावस लोलुक्य पम्पोश ॥० ॥

ब्यल तु मादल तु ग्वलाब येम्बरजल,

नेँ मसवल शिहिज नय आरुवल ।

कोसि कजा लोलुच शेरि पॉरावस ॥

पादन वहरावस लोलुक्य पम्पोश ॥० ॥

छंडिथ छोरिथ फ्यूरुस अस्तानन,

मत्यन मस्तानन शहरु तु गाम ।

अनुग्रेह अनन्त लोबुम बबु चिकु चावस ॥

पादन वहरावस लोलुक्य पम्पोश ॥० ॥

जर तु जेवर नॉल्य क्याह त्रावस,

अथ शांत स्वबावस सासु सिर्ययि प्रकाश ।

तीजुक्य गोवहर भगवानु नावस ॥

पादन वहरावस लोलुक्य पम्पोश ॥० ॥

सनि ख्वतु सौन समन्दर ग्यानुक,

द्यानुक हिमालु थदि ख्वतु थोदुय ।

प्रेयमुक आबशार लोलु देंर्ययावस ॥

पादन वहरावस लोलुक्य पम्पोश ॥० ॥

करि युस मीठ्य अथ शीतल खावे,

प्रावे अजर अमर बखित द्यन ।

भगवान मेहरबान रोज़ान बखित बावस ॥

पादन वहरावस लोलुक्य पम्पोश ॥० ॥

कैरिथ अर्पन जुव तु जान चरनन,

परन प्योमुत 'रोशि रोशि'

मनि छुम हावुस बु लोल च्यतस पावस ॥

पादन वहरावस लोलुक्य पम्पोश ॥० ॥

* * *

छ्वपु

कस वनु वुछ मे क्याह क्याह, यादु वोतरिस खनु कोताह ।

आफताब वुहान गाहे नपुवन्य जूनाह, यादु वोतरिस खनु कोताह ।।

मे नेन्द्रु गॅज मॅछ्यजन रॉचन, वहरॉचन आराम तु करार ।

छ्वन्य र्वनि पादुक गाहे मोदुर सोज़ाह, यादु वोतरिस खनु कोताह ।।

गूव्युन्दु गू सुबहन सुबहन, रुमन रुमन अजब गुंगुराय ।

म्वरली धर वुछनुक गाह बोज़नुक तमाह, यादु वोतरिस खनु कोताह ।।

स्वरगुच मसवल पान पुरिथ, लॉगिथ अनॉर्य जामु हैरि ब्वन ।

डैकि चॅन्द्रम गाहे बेअनन्त नूराह, यादु वोतरिस खनु कोताह ।।

अडु रॉच पुनिम फ्वलिथ, छेलिथ संगि मर मर वॅलिथ ।

राज़ु होंज़स गाहे सवार सुहा, यादु वोतरिस खनु कोताह ।।

ख्यलु वॅथरस प्यठ स्वन्दरमाला, ज़ाला पम्पोशु रंगु रंगिथ ।

हूरा गाहे फर्शिच श्रूच कूराह, यादु वोतरिस खनु कोताह ।।

ननुवोर तु नंगय सूर मॅलिथ, नॉल्य त्रॉविथ कालु शहमार ।
अजब ग्वसोन्य गाहे जॉलिथ दून्याह, यादु वोतरिस खनु कोताह ।।

पोज़ बोज़ वुछुम दसतार लॉगिथ, छुनिथ खाव मुशिक संदल ।
द्यानु ग्यानु गाहे वथ हावान सरि राह, यादु वोतरिस खनु कोताह ।।

रवा खूनस तु दिलु दुबरायि, ग्रायि मारान च्यूनुम 'रोशि रोशि' ।
शाम गाहे राम शापन दिवान दाह, यादु वोतरिस खनु कोताह ।।

* * *

बु सर नोमरिथ

चानि बारगाहि बु सर नोमरिथ,
होमरिथ शोमरिथ हम तय खम ।
व्यच्चॉरिथ चुय बबु ज़ेय सोरिथ ।।
होमरिथ शोमरिथ हम तय खम ।।० ।।

चटिथ गागलु करुम मदहेश,

नोश करुनावुम जामि मॉर्यफत ।

बु प्रारान बर तल बानु दॉरिथ ।।

होमरिथ शोमरिथ हम तय खम ।।० ।।

जंजालुक्य मे ह्यस मॅशिराव,

चिकु चाव थावुम फकत पनुन ।

चानि वेरि लोलुक दामानु वॅहरिथ ।।

होमरिथ शोमरिथ हम तय खम ।।० ।।

मन्दरन अस्तानन छम नु वथ वनि,

मनि छम बस मूरथ चॉनी ।

फुटरिथ हाँकलु वछस दॉर मुचरिथ ।।

होमरिथ शोमरिथ हम तय खम ।।० ।।

बॅनिथ ग्वर वरुम पादन तल,

सॅहल करुम सफरि सॅहराव ।

अग्यानस कोफूर तु ओश हौरिथ ॥

होमरिथ शोमरिथ हम तय खम ॥० ॥

मे छुम क्याह जमा ती दिमय,

निमय क्याह डॉल्य बु चन्दु छोनय ।

बु शापव वॅलिथ दौद्यय सौंबरिथ ॥

होमरिथ शोमरिथ हम तय खम ॥० ॥

अजर अमर सासु त्यवंगुलन हुंज,

स्वनु सुंज रेह ज़ोतान तु प्रज़लान ।

सूर मनकलि हुंद पानस मॅलिथ ॥

होमरिथ शोमरिथ हम तय खम ॥० ॥

छेती रूदिम यिम छेत्य रंग,

अंग अंग ज़रद्योम 'रोशि रोशि' ।

चानि लोलु रंगु हन हन रँगिथ ॥

होमरिथ शोमरिथ हम तय खम ॥० ॥

* * *

सेदिस तु शोदिस

बबु भगवानु सुंद द्याना सोरिथ,

दोरिथ हलम छुस पादन तल ।

सेदिस तु शोदिस पान पुशरिथ ।।

दोरिथ हलम छुस पादन तल ।।० ।।

बु न्यथुनोन तु नंगय तुरयोमुत,

नील्योमुत अंग अंग ।

ओश हॉर्य हॉर्य हालि दिल बाँविथ ।।

दोरिथ हलम छुस पादन तल ।।० ।।

सुबहॉय द्रायोस चानि कलि,

ज्वलि गोस मंज वति बेहेस तु बेहेश ।

बास्तम चवापॉर्य नेन्द्रि वुजुनॉविथ ।।

दोरिथ हलम छुस पादन तल ।।० ।।

दुह्य छ्यतु अकलि लिन्य आचारस,

व्यचारस सफन क्रेहन्य काव ।

हम खम जॉलिथ मद होमुरॉविथ ।।

दोरिथ हलम छुस पादन तल ।।० ।।

सॅनिस सॅहरावस नोन हावबाव,

ताव तॅचि तावि अग्यानुक ।

मन व्य़च़ोरिथ ग्यान सरु करुनॉविथ ॥

दॉरिथ हलम छुस पादन तल ॥० ॥

मन्दरन अस्तानन मे त्रोवमुत गछुन,

वसुन नागु बल ति मॅशरोवमुत ।

बु चानि पूज़ायि बस सर नोमरिथ ॥

दॉरिथ हलम छुस पादन तल ॥० ॥

त्रेय पज़रूक तीज़ च़ु नूरु बॅरिथ,

जॅरिथ त्रेय सिर्यि त्रॅन्द्रम म्वखस ।

अनुग्रैह खज़ानस दामानु वॅहरिथ ॥

दॉरिथ हलम छुस पादन तल ॥० ॥

आश बॅखुत्यन फक्त चॉनी,

चॉनी सथ छख सुबहु शामय ।

चोनुय नाव 'रोशि रोशि' व्य़छुनॉविथ ॥

दॉरिथ हलम छुस पादन तल ॥० ॥

* * *

सोपुन किनु ब्रम

दप्योम वसु सँदुरस तु छांति तरु, सरु कॅरन सोन समन्दर ।
व्वलु गथु व्वलरस अँनन अँरु, दरु दिथ चॅटन अँहर थँहर ॥
जागि रूजिथ प्रार्योस नाबूदस, रूदुस तापस बोरुम नु वायि ।
ग्रंद रॉवम असलस तु सूदस, छरिस चन्दस सोरुम छेनिमुच कायायि ॥
ग्वतु जोराह दिथ फ्यूरुस पोत, लोत लोत खोतुस बँठिसु ।
गाहे तुरुन गाहे लोगुम तोत, दोपुम कोत लोगुस अनि गटिस ॥
नु वोंतुय लोबुम नु आगुर चून्युम, म्यून्युम पोन्थ अथव अथव ।
म्वछि मुचरिथ अफसूस ज्यून्युम, फ्यून्युम कतरु कतरु छेर्यव कथव ॥
पॅरिथ लीखिथ अनपड रूदुस, मूदुस जन्दुय हति फिरे ।
अग्यानु मानि तल कोठिश दोदुस, खोतुस दर ज़बॉन्थ तु हिरि फिरे ॥
सोपुन ओसा किनु ब्रम येलि दसतार गँडिथ, पंडित वुछुम फ्यरना लॉगिथ ।
सोरिथ व्यचॉरिथ मॅशिथ गोम, यि ब्रोंह कनि तस ओसुम वनुन ॥
यत्न कोरुम अज़ दपस, 'रोशि रोशि' गुदुरुन पनुन ।
सोरिथ व्यचॉरिथ मॅशिथ गोम, यि ब्रोंह कनि तस ओसुम वनुन ॥

* * *

M. College of Education
Raipur, Bantalab
Jammu.

109

No. 547.5
Date. 29/7/24



डॉ रोशन सराफ
"सौशि सौशि"